

舊五代史

一三

蘇子卿

PDG

舊五代史卷八十

宋司空同中書門下平章事薛居正等撰

高祖紀第六

舊唐書

天福六年秋七月己未朔帝御崇光殿視朝庚申升陳州爲防禦使額辛酉以前鄧州節度使焦方爲貝州節度使壬戌涇州奏西涼府留後李文謙今年二月四日閉宅門自焚遣元人西涼府譯語官與來人賁三部族蕃書進之以三司使劉審交爲陳州防禦使癸未以前鄆州節度使趙在禮爲許州節度使以前鄴都留守廣晉尹高行周爲河南尹西都留守詔改拱辰威和內直

等軍並爲興順甲子以宣徽使權西京留守張從恩判
三司己巳以鄴都留守兼侍衛親軍馬步軍都指揮使
廣晉尹劉知遠爲太原尹充北京留守河東節度使仍
割遼沁二州却隸河東以北京留守李德珣爲廣晉尹
充鄴都留守以昭義節度使馬全節爲邢州節度使加
同平章事甲戌詔今後諸道行軍副使不得奏薦骨肉
爲殿直供奉官己卯以前陝州節度使李從敏爲昭義
軍節度使以陝州節度使景延廣爲河陽三城節度使
兼侍衛親軍馬步軍都虞候以河陽節度使石贇爲陝
州節度使壬午突厥遣使朝貢以遙領壽州忠正軍節

度使兼侍衛馬軍都指揮使李懷忠爲同州節度使以宣徽北院使李守貞遙領忠正軍節度使侍衛馬軍指揮使甲申降御札取八月五日暫幸鄴都汧路供頓並委所司以官物排比州縣不得科率人戶丙戌以右諫議大夫趙遠爲中書舍人吏部郎中鄭受益爲右諫議大夫刑部郎中殷鵬爲水部郎中知制誥八月戊子朔以皇子開封尹鄭王重貴爲東京留守以天平軍節度使兼侍衛親軍馬步軍副都指揮使杜重威爲侍衛親軍馬步軍都指揮使以宣徽南院使張從恩爲東京內外兵馬都監改奉德馬軍爲護聖放文武百官朝參取

便先赴鄴都壬辰車駕發東京己亥至鄴左右金吾六軍儀仗排列如儀迎引入內改舊澶州爲德清軍以內客省使劉遂清爲宣徽北院使判三司壬寅制應天福六年八月十五日昧爽以前諸色罪犯常赦所不原者咸赦除之其持仗行劫及殺人賊並免罪移鄉配逐處軍都收管犯枉法贓者雖免罪不得再任用諸徒流人並放還貶降官未量移與量移者約資敘用天福五年終已前殘稅並放應河東起義之初及收復鄴都汜水立功將校並與加恩亡歿者與追贈自東京至鄴都緣路昨因行幸有損踐田苗處據頃畝與放今年租稅鄴

都管內有潛龍時在職者並與加恩者年八十已上者
版授上佐官天下農器並許百姓自鑄造亡命山澤者
招喚歸業百日不出者復罪如初唐梁國公狄仁傑宜
追贈官秩應天福三年已前敗闕場院官無家業者並
與除放其人免罪永不任使私下債負徵利及一倍者
並放主持者不在此限丁未以客省使將作監丁知浚
爲內客省使引進使鴻臚卿王景崇爲客省使殿中監
判四方館事劉政恩爲引進使王子改鄴都皇城南門
應天門爲乾明門大明館爲都亭驛甲寅遣光祿卿張
澄國子博士謝攀使高麗行冊禮九月己未以兵部侍

郎閭至爲史部侍郎辛酉滑州河決一溉東流鄉村戶
民攜老幼登邱塚爲水所隔餓死者甚眾王申忠武建
武等軍節度使守太傅兼中書令行蘇州睦州刺史錢
元璪進封彭城郡王遙領廣州清海軍節度使判婺州
軍州事錢元懿爲檢校太師乙亥遣前邢州節度使楊
彥詢使于契丹錫賚甚厚丁丑吐渾遣使朝貢壬午夜
有彗星出于西方長二丈餘在房一度尾跡穿天市垣
東行踰月而滅丙戌兗州上言水自西來漂沒秋稼冬
十月丁亥朔遣鴻臚少卿魏玘等四人分往滑濮鄆澶
視水害苗稼己丑詔以胡梁度月城爲大通軍浮橋爲

大通橋王寅詔唐梁國公狄仁傑可贈太師十一月丁未鄭王夫人張氏薨福州王延羲遣使貢方物甲寅遣太子賓客聶延祚吏部郎中盧撰持節冊天下兵馬元帥守尙書令吳越國王錢元瓘甲子以御史中丞王松爲尙書右丞中書舍人史館修撰判館事王易簡爲御史中丞戶部侍郎張昭遠爲兵部侍郎國子祭酒田敏以本官兼戶部侍郎辛未太妃皇后至自東京王申遣給事中李式考功郎中張鑄持節冊閩國王王延羲甲戌太子少傅致仕王瓘卒贈左僕射丁丑襄州安從進舉兵叛以西京留守高行周爲南面行營都部署率兵

討之以前同州節度使宋彥筠爲副以宣徽南院使張
從恩監護焉十二月丙戌朔以東京留守開封尹鄭王
重貴爲廣晉尹進封齊王以鄴都留守廣晉尹李德珣
爲開封尹充東京留守南面軍前奏十一月二十七日

武德使焦繼勳先鋒都指揮使郭金海等唐州南遇安

從進賊軍一萬餘人大破之

案宋史陳思讓傳思讓爲先鋒右廂都監從武德焦

繼勳領兵進討遇從進之師于唐州花山下急擊大破之

生擒衙內都指揮使安宏

義獲山南東道之印其安從進單騎奔逸丁亥詔襄州

行營都部署高行周權知襄州事是日鎮州節度使安

重榮稱兵向闕

案安重榮反在十二月丁亥五代春秋誤繫于十月以侍衛親軍

馬步軍都指揮使杜重威爲北面行營招討使率兵擊之以邢州節度使馬全節爲副以前貝州節度使王周爲馬步軍都虞候癸巳武德使焦繼勳奏安從進遣弟從貴領兵千人取接均州刺史蔡行遇尋領所部兵掩殺賊軍七百餘人生擒安從貴截其雙腕却放入城戊戌以皇子重睿爲銀青光祿大夫檢校尙書左僕射己亥北面軍前奏十三日未時於宗城縣西南大破鎮州賊軍殺一萬五千人餘黨走保宗城縣是夜三更破縣城前深州刺史史虔武自縛歸降獲馬三千匹絹二萬餘疋餘物稱是安重榮脫身遁走是日百官稱賀癸卯

削奪安從進安重榮在身官爵右金吾上將軍萇從簡
卒廢朝贈太師乙巳天下兵馬都元帥守尙書令吳越
國王錢元瓘薨廢朝三日諡曰文穆是日帝習射於後
苑諸軍都指揮使已上悉預焉賜物有差丁未南面行
營都部署高行周奏今月十三日部領大軍至襄州城
下相次降賊軍二千人其降兵馬軍詔以彰聖爲號步
軍以歸順爲號庚戌以權知吳越國事錢弘佐爲起復
鎮軍大將軍檢校太師兼中書令杭州越州大都督鎮
海東等軍節度使封吳越國王壬子杜重威部領大將
至鎮州城下

天福七年春正月丙辰朔不受朝賀用兵故也戊午以前將作監李錯爲少府監北面招討使杜重威奏今月已收復鎮州斬安重榮傳首闕下帝御乾明樓宣露布

訖大理卿受馘付市徇之百官稱賀曲赦廣晉府禁囚

遼史云戊辰晉函安重榮首來獻上數欲親討重榮至是乃止辛酉追贈皇弟三人故

忻州馬步軍都指揮使贈太傅德再贈太尉追封福王故檢校太子賓客贈太傅殷再贈太尉追封通王故彰聖右第三軍都指揮使長州刺史贈太傅威再贈太尉追封廣王壬戌追贈皇子五人故右衛將軍贈太保重英再贈太傅追封號王故權東京留守河南尹贈太傅

重父再贈太尉追封壽王故皇城副使贈太保重裔再
贈太傅追封鄴王故河陽節度使贈太尉重信再贈太
師追封沂王故左金吾衛將軍贈太保重進再贈太傅
追封夔王癸亥改鎮州爲恆州成德軍爲順國軍丙寅
以門下侍郎平章事監修國史趙瑩爲侍中青州節度
使楊光遠加食邑改賜功臣名號兗州節度使桑維翰
加檢校太保河東節度使劉知遠加兼侍中以鄆州節
度使北面行營招討使侍衛親軍都指揮使杜重威爲
恆州順國軍節度使加兼侍中皇子廣晉尹兼功德使
齊王重貴加兼侍中秦州節度使侯益加特進增食邑

丁卯以判四方館事孟承誨爲太府卿充職戊辰以滄州節度使安叔千爲邢州節度使以北面行營副招討使邢州節度使馬全節爲定州節度使以定州節度使王延珩爲滄州節度使以前邢州節度使楊彥詢爲華州節度使恆州立功將校王溫以降等第除郡庚午契丹遣使來聘是日上元節六街諸寺燃燈御乾明門觀之夜半還宮壬申延州節度使丁審琦加爵邑鄧州節度使安審徽加檢校太傅陝州節度使石贊加檢校太傅乙亥契丹遣使來聘河陽節度使兼侍衛馬步軍都虞候景延廣加檢校太尉改鄆州節度使典軍如故以

前貝州節度使北面行營馬步軍都虞候王周爲河陽
節度使加檢校太保丁丑以刑部侍郎竇貞固爲門下
侍郎以禮部郎中邊歸讜爲比部郎中知制誥王午以
河陽節度使王周爲涇州節度使以恆州節度副使王
欽祚爲殿中監二月丁亥皇妹清平公主進封衛國長
公主契丹遣使來聘己丑宴于武德殿新恆州節度使
杜重威己下諸軍副兵馬使己下悉預焉賜物有差己
亥以曹州防禦使何建爲延州留後涇州奏差押牙陳
延暉資勅書往西涼府本府都指揮使等請以陳延暉
爲節度使辛丑宰臣李崧丁母憂起復舊任蕃寇作亂

同州鄜州各起牙兵討平之丙午詔鄧唐隨郢諸州多有曠土宜令人戶取便開耕與免五年差稅三月己未兵部尙書韓惲卒庚申遣前齊州防禦使宋光鄴翰林茶酒使張言使于契丹壬戌分命朝臣諸寺觀禱雨丙寅皇后爲妹契丹樞密使趙延壽妻燕國長公主卒於幽州舉哀於外次辛未滑州節度使駙馬都尉史匡翰卒輟朝贈太保詔唐州湖陽縣蓼山神祠宜賜號爲蓼山顯順之神乙亥以晉昌軍節度使安審琦爲河中節度使以前亳州防禦使王令溫爲貝州節度使丙子賜宰臣李崧白藤肩輿以起復故也丁丑以晉州節度使

皇甫遇爲河陽節度使以壽州節度使兼侍衛馬步軍
指揮使李守貞爲滑州節度使以夔州節度使兼侍衛
步軍都指揮使郭達

郭達刻本
作郭謹

爲相州節度使皆典軍

如故宰臣於寺觀禱雨閏月丙戌以兵部郎中司徒詡
爲右諫議大夫戊子兗州節度使桑維翰加特進封開
國公庚寅以延州留後何建爲延州節度使以引進使
兼殿中監劉正恩爲太子詹事壬辰宋州節度使安彥
威奏修滑州黃河功畢詔於河決之地建碑立廟丙申
以鄆州節度使周密爲晉州節度使以左羽林統軍符
彥卿爲鄆州節度使壬寅詔百官五日一度起居日輪

定兩員具所見以封事奏聞詔改鄴都宣明門爲朱鳳
門武德殿爲視政殿文思殿爲崇德殿畫堂爲天清殿
寢殿爲乾福殿其門悉從殿名皇城南門爲乾明門北
門爲玄德門東門爲萬春門西門爲千秋門羅城南塼
門爲廣運門觀音門爲金明門橙槽門爲清景門冠氏
門爲永芳門朝臣門爲景風門大城南門爲昭明門觀
音門爲廣義門北河門爲靜安門魏縣門爲應福門冠
氏門爲迎春門朝城門爲興仁門上斗門爲延清門下
斗門爲通遠門戊申宋州節度使安彥威封邠國公賞
修河之勞也癸丑涇州節度使王周奏前節度使張彥

澤在任日不法事二十六條已改正停廢詔褒之是春
鄴都鳳翔充陝汝恆陳等州旱鄆曹澶博相洺諸州蝗
夏四月甲寅朔避正殿不視朝日蝕故也是日太陽不
虧百官上表稱賀詔沿河藩郡節度使刺史並兼管內
河堤使己未右諫議大夫鄭受益兩疏論張彥澤在涇
州之日違法虐民支解掌書記張式部曲楊洪等請下
所司明申其罪皆留中不出庚申刑部郎中李濤張麟
員外郎麻麟王禧同詣閣門上疏論張彥澤罪犯詞甚
懇切宋史李濤傳涇帥張彥澤殺記室張式奪其妻式
家人詣闕上訴晉祖以彥澤有軍功釋其罪濤伏
閣抗疏請寘于法晉祖召見諭之濤植笏叩陛聲色俱
厲晉祖怒叱之濤執笏如初晉祖曰吾與彥澤有誓約

恕其死濤厲聲曰彥澤私誓陛下不忍食其言范辛酉
延光嘗賜鐵券今復安在晉祖不能答卽拂衣起
詔張彥澤剗剔賓從誅剝生聚冤聲穢跡流聞四方章
表繼來指陳甚切尙以曾施微効特示寬恩深懷曲法
之慙貴狗議勞之典其張彥澤宜削一階仍降爵一紀
其張式宜贈官張式父鐸弟守貞男希範並與除官仍
於涇州賜錢十萬差人津置張式靈柩并骨肉歸鄉所
有先收納却張式家財物畜並令還其涇州新歸業戶
量與蠲減稅賦翌日以前涇州節度使張彥澤爲左龍
武大將軍宋史楊昭儉傳昭儉與李濤論張彥澤不報
會有詔令朝臣轉對或有封事亦許以不時
條奏昭儉復上疏曰天子君臨四海日有萬幾懋建諍
臣彌縫其闕今則諫臣雖設言路不通藥石之論不達

于聖聰而邪佞之徒取容于左右御史臺紀綱之府彈糾之司銜冤者固當昭雪爲蠹者難免放流陛下臨御以來寬仁太甚徒置兩司殆如虛器遂令節使慢侮朝章屠害幕吏始訴冤于丹闕反執送于本藩苟安跋扈之心莫恤冤抑之苦願回宸斷誅彥澤以謝軍徒

戊辰廢雄州爲昌化軍警州

爲威肅軍其軍使委本道差補故涇州節度掌書記張式贈尙書虞部郎中以式父鐸爲沁州司馬致仕弟守貞爲貝州清河縣主簿男希範爲興元府文學甲戌詔皇子齊王就前河中府節度使康福第以教坊樂宴會前見任節度使戊寅前慶州刺史米廷訓追尊在身官爵配流麟州坐姦妻兄之女也是月州郡十六處蝗五月己亥中書門下奏時屬炎蒸事宜簡省應五日百官

起居望令押班宰臣一員押百官班其轉對官兩員封付閤門使引進本官隨百寮退不用別出謝恩其文武內外官寮乞假寧覲搬家婚葬病損並門見門辭諸道進奉物等不用殿前排列引進使引進殿前奏云某等進奉奏訖令進奉使出其進奉專使朝見日班首一人致詞都附起居刺史并行軍副使諸道馬步軍都指揮使已下差人到闕並門見門辭州縣官謝恩日甲頭一人都致詞不用逐人告官其供奉官殿直等如是當直及合於殿前排列者卽入起居如不當直排立者不用每日起居委宣徽使點檢常須整齊從之時帝不豫難

於視朝故也

遼史二月甲午遣使使晉索吐谷渾叛者契丹國志云遼以晉招納吐谷渾遣使責

讓晉高祖憂悒成疾

左威衛上將軍衛審崱卒贈太子少保乙巳

尊皇太妃劉氏爲皇太后

徐無黨五代史記注云高祖所生母也

丁未工

部侍郎韋勳改刑部侍郎王子以左散騎常侍李光廷

爲秘書監給事中蕭愿爲右散騎常侍左諫議大夫曹

國珍爲給事中太常卿裴坦爲左諫議大夫是月州郡

五奏大冰十八奏旱蝗六月丁巳以兗州節度使桑維

翰爲晉昌軍節度使以前許州節度使安審琦爲兗州

節度使襄州都部署高行周奏安從進觀察判官李光

圖出城請援送赴闕乙丑帝崩於保昌殿壽五十一遺

制齊王重貴於柩前卽皇帝位喪紀並依舊制山陵務

從節儉馬步諸軍優紀並從嗣君處分

通鑑攷異云漢高祖實錄晉高

祖大漸召近臣屬之曰此天下明宗之天下寡人竊而處之久矣寡人旣謝當歸許王寡人之願也此說難信

八月太常卿崔悅上諡曰聖文章武明德孝皇帝廟號

高祖以其年十一月十日庚寅葬於顯陵宰臣和凝撰

謚冊哀冊文

永樂大典卷一萬五千六百四十四五

將起兵於太原京師夜間狼皆羣走往往入宮中愍帝患之命諸班能射者分投捕逐謂之射狼或遇諸塗問

曰汝何從而來對曰看射狼未幾高祖至蓋射音與石相近也五代史闕文梁開平初潞州行營使李思安

奏函關縣穰鄉民伐樹樹仆自分爲二中有六字如左書云天十四載石進梁帝藏于武庫時莫詳其義至帝

卽位識者曰天字取四字兩畫加之于傍卽丙字也四字去中之兩畫加十字卽申字也帝卽位之年迺丙申

也進者晉也石者姓也臣謹案天祐二十年歲在癸未其年莊宗建號改同光元年至清泰三年歲丙申其年晉祖卽位改元天福元年自未至申凡十四載矣故識書云天十四載石進者言自天祐滅後十四載石氏興於晉也豈不明乎而拆字解識以就丙申非也

史臣曰晉祖潛躍之前沉毅而已及其爲君也旰食宵衣禮賢從諫慕黃老之教樂清淨之風以純爲衣以麻爲履故能保其社稷高朗令終然而圖事之初召戎爲援獫狁自茲而孔熾黔黎由是以罹殃迨至嗣君兵連禍結卒使都城失守舉族爲俘亦猶決鯨海以救焚何逃沒溺飲鳩漿而止渴終取敗亡謀之不臧何至於是儻使非由外援之力自副皇天之命以茲睿德惠彼蒸

民雖未足以方駕前王亦可謂仁慈恭儉之主也

永樂大典

卷一萬五千
六百四十四

舊五代史卷八十終

舊唐書卷一百一

本紀

三

舊五代史卷八十攷證

晉高祖紀六乙亥遣前邢州節度使楊彥詢使于契丹
案楊彥詢使于契丹歐陽史通鑑俱從是書作九月
遼史作二月己未晉遣楊彥詢來貢且言鎮州安
重榮跋扈狀遂留不遣與是書異

丁丑襄州安從進舉兵叛 案安從進反歐陽史五代
春秋俱作十月通鑑從是書作十一月遼史作十二
月戊子晉遣使來告山南節度使安重進反則因其
赴告之月而書之也

生擒衙內都指揮使安宏義 案宋史焦繼勳傳作擒

其牙將安洪義鮑洪等五十餘人

是日鎮州節度使安重榮稱兵向闕 案安重榮反歐

陽史通鑑俱從是書作十二月五代春秋繫于十月
之後遼史作十一月丙寅晉以討安重榮來告與是
書異

遣前齊州防禦使宋光鄴 宋光鄴遼史避諱作宋暉

業

宋州節度使安彥威奏修滑州黃河功畢 案修河事

是書紀于閏月壬辰歐陽史作三月歸德軍節度使
安彥威塞決河于滑州蓋以奉使之月言是書以奏

功之日言也

詔改鄴都宣明門爲朱鳳門 朱鳳門五代會要作來

鳳門

皇城南門爲乾明門北門爲元德門東門爲萬春門西
門爲千秋門 案五代會要晉改皇城四門爲乾明
元德萬春千秋在天福六年是書統繫于七年與會
要異

舊五代史卷八十攷證

舊五代史卷八十一

朱司空同中書門下平章事薛居正等撰

少帝紀第一

晉書七

少帝名重貴高祖之從子也考諱敬儒母安氏以唐天祐十一年六月二十七日生帝于太原汾陽里敬儒嘗爲後唐莊宗騎將早薨高祖以帝爲子帝少而謹厚高祖愛之洎歷方鎮嘗遣從行委以庶事但性好馳射有祖禰之風高祖鎮太原命瑯琊王震以禮記教帝不能領其大義謂震曰非我家事業也及高祖受圍于太原親冒矢石數獻可于左右高祖愈重焉高祖受契丹冊

入洛欲留一子撫晉陽先謀於戎王戎王曰使諸子盡
出吾當擇之乃於行中指帝謂高祖曰此眼大者可矣
遂以帝爲北京留守授金紫光祿大夫檢校司徒行太
原尹知河東管内節度觀察事天福二年九月徵赴闕
授光祿大夫檢校太保右金吾衛上將軍三年十二月
授開封尹加檢校太傅封鄭王增食邑三千戶俄加檢
校太尉同中書門下平章事六年高祖幸鄴改廣晉尹
進封齊王以下疑脫七年正是歲六月十三日案此歲
月加兼侍中八字爲天福
七年此承上六年爲乙丑高祖崩承遺制命樞前卽皇
言于中當有脫文

帝位帝在并州未著人望及保釐浚郊大有寬裕之稱

從宰鄴都是歲遇旱高祖遣祈雨于白龍潭有白龍見于潭心是夜澍雨尺餘人皆異之至是果登大位焉丁卯賜侍衛諸軍將校錢一百貫下至五貫以初卽位示賚也戊辰宰臣馮道等率百寮請聽政凡三上表允之庚午始聽政于崇德殿門偏廊分命廷臣以嗣位奏告天地宗廟社稷遣右驍衛將軍石德超等押先皇御馬二匹往相州西山撲祭用北俗禮也丙子以司徒兼侍中馮道爲大行皇帝山陵使門下侍郎竇貞固副之太常卿崔棣爲禮儀使戶部侍郎呂琦爲鹵簿使御史中丞王易簡爲儀仗使

徐無黨五代史記注云舊史實錄無橋道頓遞使疑不置或闕書漢

高祖已卯遣判四方館事朱崇節案歐陽史作館使宋崇節右金吾

大將軍梁言持國信物使于契丹是時河南河北關西

並奏蝗害稼秋七月癸未朔百官素服臨于天清殿戊

子詔應宮殿州縣及官名府號人姓名與先帝諱同音

者改之改西京明堂殿爲宣德殿中書政事堂爲政事

廳堂後官房頭爲錄事餘爲主事案東都事略陶穀傳穀本姓唐避晉祖諱

改姓陶蓋當時避諱之體如此已丑大行皇帝大祥帝釋縗服百官衣

縗辛卯帝除禫服百官吉服壬辰太皇太后劉氏崩高

帝之庶母也遺詔服紀園陵毋用后禮皇帝不得廢軍

國機務既而禮官奏準令式爲祖父母齊縗周又準喪

葬令皇帝本服周者三哭而止請準後唐同光三年皇
太妃北京薨莊宗于洛京西內發哀素服不視事三日
從之仍遣國子祭酒兼戶部侍郎田敏奏告高祖靈座
癸巳右諫議大夫鄭受益中書舍人楊昭儉並停見任
以請假在外不赴國哀故也丁酉宰臣馮道等率文武
百寮詣崇德殿門拜表請御正殿凡三上表允之安州
奏水平地深七尺庚子帝御正殿宣制大赦天下諸道
州府諸色罪犯除十惡五逆殺人強盜官典犯賊合作
毒藥屠牛鑄錢外其餘罪犯咸赦除之襄州安從進如
能果決輸誠並從釋放其中外臣寮將校並與加恩天

下有蟲蝗處並與除放租稅辛丑恆州順國軍節度使

杜威

案杜重威避少帝諱去重字至漢始復故少帝紀皆作杜威

河東節度使劉知

遠並加檢校太師仍增爵邑青州平盧軍節度使楊光

遠加守太師癸卯鄆州天平軍節度使兼侍衛馬步都

虞候景延廣加特進同中書門下平章事充侍衛親軍

都指揮使滑州義成軍節度使兼侍衛馬軍都指揮使

李守貞相州彰德軍節度使侍衛步軍都指揮使郭謹

並加檢校太傅仍增爵邑宰臣馮道等上表請依舊置

樞密使略曰竊以樞密使創自前朝置諸近侍其來已

久所便尤多頃歲樞密使劉處讓偶屬家艱爰拘喪制

既從罷免暫議改更不曾顯降勅文永停使額所願各歸職分豈敢苟避繁難伏請依舊置樞密使初高祖事後唐明宗觀樞密使安重誨秉政擅權賞罰由已常惡之及登極故斷意廢罷一委中書至是馮道等厭其事繁故復請置之庶分其權表凡三上不允乙巳徐州節度使李從溫宋州節度使安彥威並加兼中書令西都留守充襄州行營都部署高行周加兼侍中鳳翔節度使李從暉加守太保遣中使就中書賜宰臣馮道生辰器幣道以幼屬亂離早喪父母不記生日堅辭不受丙午以給事中羅周岳爲左散騎常侍以右諫議大夫符

蒙爲給事中以秘書少監兼廣晉少尹邊蔚爲右散騎
常侍以廣晉少尹張煦爲右諫議大夫以廣晉府判官
光祿少卿邊光範爲右諫議大夫丁未荆南節度使南
平王高從誨加兼尙書令湖南節度使楚王馬希範加
守太傅自是藩侯郡守皆第加官封示溥恩也是月州
郡十七蝗八月壬子朔百官素服臨於天清殿乙卯以
左散騎常侍羅周岳爲東京副留守庚申以山陵禮儀
使太常卿崔悅爲太子賓客分司西都病故也壬戌晉
昌軍節度使桑維翰加檢校太傅甲子宰臣馮道加守
太尉趙瑩加中書令李崧加左僕射兼門下侍郎和凝

加右僕射契丹遣使致慰禮馬二十匹及羅絹等物是日襄州行營都部署高行周奏收復襄州安從進自焚而死生擒男引贊斬之前河東節度使康福卒贈太師諡曰武安戊辰以太子太保兼尙書左僕射劉昫爲太子太傅詔賜襄州城內百官粟大戶二斛小戶一斛以久困重圍也已巳以太子賓客趙元輔權判太常卿事充山陵禮儀使庚午葬太皇太后于魏縣秦固村癸酉契丹使致祭于高祖賻禮御馬二匹羊千口絹千疋契丹主母亦遣使來慰詔免襄州城內人戶今年夏秋來屋稅其城外下營處與放二年租稅應被安從進脅從

者一切不問是月河中河東河西徐晉商汝等州蝗九月丁丑朔百官素服臨于天清殿己卯分遣朝臣詣寺觀祈雨辛巳兩浙節度使吳越國王錢弘佐福建節度使王延義並加食邑仍改賜功臣名號癸未帝御乾明門觀襄州行營都部署高行周都監張從恩等獻俘馘有司宣露布訖以安從進男弘受等四十四人徇于市皆斬之曲赦京城禁囚甲申宴班師將校于崇德殿賜物有差乙酉宰臣和凝上廻河頌賜鞍馬器帛丁亥以宋州歸德軍節度使安彥威爲西京留守兼河南尹以襄州行營都部署西京留守高行周爲宋州節度使加

檢校太師戊子降襄州爲防禦使額均房二州割屬鄧州升泌州爲團練使額己丑以東京留守兼開封尹李德珣爲廣晉尹以宣徽南院使襄州行營都監張從恩爲東京留守兼開封尹加檢校太尉以前同州節度使襄州行營副部署宋彥筠爲鄧州威勝軍節度使加檢校太尉山陵禮儀使撰高祖祔享太廟酌獻樂章上之庚寅詔今後除授留守宜降麻制癸巳樂平公主史氏進封魯國大長公主壽安長公主烏氏進封衛國大長公主鄭國長公主杜氏進封宋國大長公主荆南高從誨累表讓尙書令之命己亥追封故秦國長公主爲梁

國長公主故永壽長公主爲岐國大長公主故延慶長
公主爲邠國大長公主辛丑以義成軍節度使兼侍衛
馬軍都指揮使李守貞充大行皇帝山陵一行都部署
壬寅以宣徽北院使判三司劉遂清爲鄭州防禦使以
澶州防禦使李承福爲宣徽北院使癸卯詔大行皇帝
十一月十日山陵宜自十月一日至十一月二十日不
坐放文武百官朝參甲辰上大行皇帝尊諡寶冊百官
素服班于天清殿五代會要天福七年中書門下奏山陵禮儀使狀高祖尊諡號及廟號伏
準故事將啟殯宮前擇日命太尉率百寮奉諡冊告天
于園丘畢奉諡冊跪讀于靈前此累朝之制蓋以天命
尊極不可稽留今所上高祖聖文章武明德孝皇帝尊
諡寶冊伏緣去洛京地遠寶冊難以往來當司詳酌伏

請祇差官往洛京奏告南郊太廟其日中書門下文武百官立班中書令侍中升靈座前讀寶冊行告諡之禮禮儀使撰進高祖祔享太廟酌獻樂章舞名請以咸和之舞爲名從之冬十月辛亥朔百官素服臨于天清殿襄州利市廟封爲順正王仍令本州修崇廟宇癸亥啟攢宮百官衣初喪服入臨甲子靈駕進發帝于朱鳳門外行遣奠之祭辭畢還宮丁丑太保盧質卒贈太子太師諡曰文忠己卯宰臣李崧母喪歸葬深州遣使弔祭之庚辰契丹遣使致祭於高祖賻馬三匹衣三襲十一月庚寅葬高祖皇帝于顯陵壬辰湖南奏前洪州節度使馬希振卒戊戌詔宰臣等分詣寺廟祈雪庚子祔高

祖神主于太廟辛丑以右金吾衛大將軍權判三司董
遇爲三司使詔州郡稅鹽過稅斤七錢住稅斤十錢州
府鹽院並省司差人勾當先是諸州府除蠶鹽外每年
海鹽界分約收鹽價錢一千七萬貫高祖以所在法禁
抵犯者衆遂開鹽禁許通商令州郡配徵人戶食鹽錢
上戶千文下戶二百分爲五等時亦便之至是掌賦者
欲增財利難于驟變前法乃重其關市之征蓋欲絕其
興販歸利于官也其後鹽禁如故鹽錢亦征至今爲弊
焉是日詔天地宗廟社稷及諸祠祭等訪聞所司承管
多不精潔宜令三司預支一年禮料物色于太廟置庫

收貯差宗正丞主掌委監察使監當祭器祭服等未備

者修置

五代會要勅差宗正丞石載仁專主掌監察御史宋彥昇監庫兼差供奉官陳審璘往洛京于

太廟內隱便處修蓋庫屋五間俟畢日催促所支物色監送入庫交付訖取收領文狀歸閣每有祠祭諸司各請禮料至時委監庫御史宋彥昇宗正丞石載仁旋行給付其大祠中祠兼令監察御史檢點小祠卽令行事官檢點如致慢易本司準格科罪其祭器未有者修製已有者更仰整飭

十二月辛酉以威

武軍節度副使充福建管內諸軍都指揮使王亞澄爲威武軍副大使知節度事詔諸道州府每遇大祭祀冬至寒食立春立夏雨雪未晴不得行極刑如有已斷下文案可取次日及雨雪定後施行乙丑以前鄧州節度使安審暉爲左羽林統軍以前延州節度使丁審琪爲

右羽林統軍以前金州節度使潘瓌爲左神武統軍以前華州節度使皇甫立爲左金吾衛上將軍以右龍武統軍劉遂凝爲左驍衛上將軍以前貝州節度使馬萬爲右驍衛上將軍以左龍武大將軍張彥澤爲右武衛上將軍丙寅宰臣馮道滑州節度使兼侍衛馬軍都指揮使李守貞河陽節度使皇甫遇西京留守安彥威廣晉尹李德琬並加爵邑以山陵充奉之勞也已巳廻鶻進奉使密里等各授懷化歸德大將軍將軍郎將放還蕃庚午故洪州節度使馬希振追封齊國公辛未故中吳建武等軍節度使彭城郡王錢元璪追封廣陵郡王

丙子于闐廻鶻皆遣使貢方物

天福八年春正月辛巳盜發唐坤陵莊宗母曹太后之陵也河南府上言逃戶凡五千三百八十七餓死者兼之詔諸道以廩粟賑饑民民有積粟者均分借便以濟貧民時州郡蝗旱百姓流亡餓死者千萬計東都人士僧道請車駕復幸東京後唐莊宗德妃伊氏自契丹遣使貢馬庚寅沙州留後曹元深加檢校太傅充沙州歸義軍節度使癸巳發禁軍萬人並家口赴東京乙巳于闐廻鶻入朝使劉再成等並授懷化大將軍將軍郎將放還蕃二月庚戌御札取今月十一日車駕還東京沿

路州府不用修飾行宮食宿頓遞並以官物供給文武
臣寮除有公事合隨駕外並先次進發以侍衛親軍使
景延廣充御營使癸丑以廣晉尹李德琬權鄴都留守
己未車駕發鄴都曲赦都下禁囚甲子次封邱文武百
官見于行宮乙丑至東京甲戌以東京留守張從恩爲
權鄴都留守以皇弟檢校司徒重睿爲檢校太保開封
尹年幼未出閣差左散騎常侍邊蔚知府事丁丑以前
太僕卿薛仁謙爲衛尉卿河中逃戶凡七千七百五十
九是時天下飢穀價翔踴人多餓殍右金吾衛上將軍
劉處讓卒贈太尉三月己卯朔以中書令監修國史趙

瑩爲晉昌軍節度使以晉昌軍節度使桑維翰爲侍中

監修國史

通鑑作晉昌節度使兼侍中桑維翰爲侍中胡三省注云桑維翰始居藩鎮而兼侍中今

入朝正爲門下省長官

辛巳以左散騎常侍盧重爲秘書監以東

京副留守羅周岳爲右散騎常侍癸未青州節度使東平王楊光遠進封壽王北京留守劉知遠恆州節度使杜威並加兼中書令乙酉以鄜州節度使符彥卿爲河陽節度使以權鄴都留守前開封尹張從恩爲鄴都留守廣晉尹以右羽林統軍丁審琪爲鄜州節度使丁亥天策上將軍湖南節度使楚王馬希範加守尙書令兼中書令己丑桂州節度使馬希杲依前檢校太尉兼侍

中兼知朗州軍州事朗州武平軍節度使馬希萼加檢校太尉進封爵邑以武平軍節度副使岳州團練使馬希瞻爲檢校太尉領廬州昭信軍節度使以武安軍節度副使永州團練使馬希廣爲檢校太尉領洪州鎮南軍節度使皆楚王馬希範之弟也庚寅以宣徽北院使李承福爲右武衛大將軍充宣徽南院使以前鄭州防禦使劉繼勳爲左千牛衛大將軍充宣徽北院使國子祭酒兼戶部侍郎田敏以印本五經書上進賜帛五十段甲午有白鳥棲作坊桐樹作坊使周務掠捕而進之辛丑引進使太府卿孟承誨使契丹詔京百司攝官親

公事及五年與授初官癸卯以左諫議大夫司徒詔爲給事中左司郎中王仁裕爲右諫議大夫前鴻臚卿王均爲少府監夏四月戊申朔日有蝕之庚戌以許州節度使趙在禮爲徐州節度使以徐州節度使李從溫爲許州節度使己巳中書門下奏請以六月二十七日降誕日爲啟聖節從之是月河南河北關西諸州旱蝗分命使臣捕之五月己卯追封皇故長姊爲吳國長公主癸未皇姪女永福縣主薨輟朝三日追封平昌郡主丁亥皇第二叔祖贈太師萬友追封秦王皇第三叔祖贈太尉萬銓

案原本作詮今從歐陽史改

贈太師追封趙王皇伯贈太

傅敬儒贈太師追封宋王皇叔贈太尉福王德贈太師
追封如故皇叔贈太傅暉贈太師追封韓王皇叔贈太
尉通王殷皇叔贈太尉廣王威皇兄贈太傅郟王重裔
並贈太師追封如故皇兄贈太師沂王重信追封楚王
皇兄贈太傅統王重乂皇兄贈太師夔王重進皇弟贈
太尉陳王重杲等並贈太師追封如故仍令所司擇日
冊命辛卯以御史中丞王易簡爲尙書左丞以禮部侍
郎張允爲御史中丞以中書舍人吳承範爲禮部侍郎
以吏部侍郎王延爲尙書右丞以尙書右丞王松爲吏
部侍郎以兵部侍郎張昭遠爲吏部侍郎以戶部侍郎

呂琦爲兵部侍郎以刑部侍郎韋勳爲戶部侍郎以工部侍郎李詳爲刑部侍郎癸巳命宰臣等分詣寺觀禱雨己亥飛蝗自北翳天而南太子賓客李稅卒甲辰詔諸道州府見禁罪人除十惡五逆行刼殺人僞行印信合造毒藥官典犯贓各減一等外餘並放是時所在旱蝗故有是詔乙巳宰相國寺祈雨六月庚戌以螟蝗爲害詔侍衛馬步軍都指揮使李守貞爲臯門祭告仍遣諸司使梁進超等七人分往開封府界捕之乙卯以左羽林統軍安審暉爲潞州節度使宿州奏飛蝗抱草乾死丙辰貝州奏逃戶凡三千七百遣供奉官衛延韜詣

崇山投龍祈雨戊午以西京留守馬從斌爲左監門衛
上將軍開封府界飛蝗自死庚申河南府奏飛蝗天下
遍滿山野草苗木葉食之皆盡人多餓死禮部侍郎吳
承範卒丙寅以將冊皇太后遣尙書左丞王易簡奏告
天地陝州奏飛蝗入界傷食禾稼及竹木之葉逃戶凡
八千一百丁卯以給事中符蒙爲禮部侍郎以左諫議
大夫裴坦爲給事中辛未遣內外臣寮二十八人分往
諸道州府率借粟麥時使臣希旨立法甚峻民間碓磓
泥封之隱其數者皆斃之由是人聊生物情胥怨是
月諸州郡大蝗所至草木皆盡

永樂大典卷一萬
五千六百四十九

舊五代史卷八十一終

舊五代史卷八十一攷證

晉少帝紀一命瑯琊王震 案歐陽史作博士王震

遣判四方館事朱崇節 案歐陽史作四方館使朱崇

節

乙丑至東京 案遼史作丁未晉王至汴與是書異五
代春秋歐陽史通鑑竝從是書

河南河北關西諸州旱蝗分命使臣捕之 案歐陽史
作供奉官張福率威順軍捕蝗于陳州

仍遣諸司使梁進超等七人分往開封府界捕之 案
歐陽史作癸亥供奉官七人帥奉國軍捕蝗于京畿

與是書異

辛未遣內外臣僚二十八人分往諸道州府率借粟麥
案通鑑七月己丑詔以年饑國用不足遣使者六
十餘人于諸道括民穀與是書異

舊五代史卷八十一攷證

舊五代史卷八十二

宋司空同中書門下平章事薛居正等撰

少帝紀第二

天福八年秋七月丁丑朔京師雨水深三尺辛巳許州
節度使李從溫來朝進封楚國公壬午以前河陽節度
使皇甫遇爲右龍武統軍丁亥以宣徽南院使李承福
爲同州節度使癸巳改陝州甘棠驛爲通津驛避廟諱
也

案東都事略陶穀傳穀本姓唐避晉祖諱改
姓陶蓋當時避諱及偏旁字及同音字也

甲午正

衙命冊皇太后以宰臣李崧充使右散騎常侍李愼儀
爲副丁酉幸南莊召從駕臣僚習射路左農人各賜布



衫麻屨八月戊申右衛上將軍楊思權卒贈太傅辛亥
分命朝臣一十三人分檢諸州旱苗涇青磁鄴都共奏
逃戶凡五千八百九十諸縣令佐以天災民餓攜牌印
納者五癸酉以前昭義節度使李從敏爲左龍武統軍
九月戊寅尊秦國夫人安氏爲皇太妃帝所生母也丁
亥追冊故魏國夫人張氏爲皇后帝之元妃也丙子以
金部郎中知制誥馮玉爲檢校尙書右僕射充潁州團
練使戊子前潁州團練使周令方追奪在身官爵勒歸
私第坐前任耀州日額外配民麴錢納歸私室故也延
州奏綏州刺史李彝敏棄拋郡城與弟彝俊等五人將

骨肉二百七十口來投當州押送赴闕稱與兄夏州節度使彝殷偶起猜嫌互相攻伐故也辛卯夏州奏差宥州刺史李仁立權知綏州癸巳故絳州刺史張從訓贈太尉追冊皇后之父也甲午夏州李彝殷奏衙內都指揮使拓拔崇斌等五人作亂當時收擒處斬訖相次綏州刺史李彝敏擅將兵士直抵城門尋差人掩殺彝敏知事不濟與弟五人將家南走詔李彝敏潛結凶黨顯忤逆謀骨肉之間尙興屠害照臨之內難以含容送夏州處斬丙申幸大年莊遂幸侍衛使景延廣第延廣進金玉器玩賜延廣玉帶名馬母妻賓佐部曲僮僕錫賚

咸及之庚子以右諫議大夫邊光範爲給事中以吏部
郎中劉知新爲右諫議大夫是月諸州郡括借到軍食
以籍來上吏民有隱落者並處極法州郡二十七蝗餓
死者數十萬冬十月戊申制以吳國夫人馮氏爲皇后
仍令所司擇日備禮冊命庚戌封皇第十一妹爲嘉興
長公主第十二妹爲永泰長公主是夕五更有彗見於
東方在角旬日而滅壬子以權知延州軍州事前鳳州
防禦使杜威爲延州留後甲寅以國子祭酒兼戶部侍
郎田敏充弘文館學士判館事以吏部侍郎張昭遠充
史館修撰判館事以給事中司徒詡充集賢殿學士判

院事西京奏百姓馬知饒殺男吳九不死以其侵母食也詔赦之甲子以前延州節度使何建爲涇州節度使丙寅以涇州節度使王周爲陝州節度使己巳以左散騎常侍權知開封府事邊蔚爲工部侍郎依前知府事壬寅以前兵部侍郎李玘爲吏部侍郎癸酉命使攝太尉右僕射平章事和凝使副攝司徒給事中邊光範追冊故魏國夫人張氏爲皇后奉寶冊至西莊影殿行禮鹵簿儀仗如式十一月丁丑以鄧州節度使宋彥筠爲晉州節度使以涇州節度使何建爲鄧州節度使己卯以前鄴都留守廣晉尹李德珣爲涇州節度使丙申所

司奏議故天下兵馬都元帥吳越國王錢元瓘諡曰莊
穆詔改爲文穆戊戌遣前復州防禦吳巒權知貝州軍
事詔節度使王令溫赴闕庚子單州軍事判官趙岳奏
刺史楊承祚初夜開門出城稱爲母病往青州寧親于
孔目官齊琪處留下牌印臣已行用權知州事辛丑高
麗遣使朝貢昭化軍節度使瑞慎等州觀察等使杜建
徽進封鄖國公遣侍衛步軍都指揮使郭謹領兵赴鄆
州十二月乙巳朔遣左領軍衛將軍蔡行遇押兵士屯
于鄆州仍遣供奉官殿直二十六人自河陰至海口分
擘地方巡檢以青州節度使楊光遠謀叛故也庚戌前

左御正齊國夫人吳氏已降二十一人並進封郡國夫人
太后宮皇后宮知客夫人等亦如之太子太保致仕
梁文矩卒贈太子太傅癸丑詔河陽節度使符彥卿宋
州節度使高行周貝州節度使王令溫同州節度使李
承福陳州梁漢瑋亳州李萼懷州薛懷讓並赴闕分命
使臣諸州郡巡檢以契丹入寇故也遣給事中邊光範
前登州刺史郭彥威使于契丹行至恆州敵已犯境不
能進留于公館數月不達其命而回遼史天福八年二月乙卯晉遣使進
先帝遣物辛酉晉遣使請居汴從之三月丁未晉主至
汴遣使來謝五月己亥遣使如晉致生辰禮六月辛酉
晉遣使貢金
已未如奉聖州晉遣其子延煦來朝
甲寅以鄆州刺

史楊承祚爲登州刺史從其便也華州陝府奏逃戶凡一萬二千三百乙丑臘車駕不出詔前陝州節度使石贊率諸節度使畋于近郊太子賓客聶延祚卒丁卯詔宣徽使劉繼勳就杜威園亭會節度使統軍等習射淄州奏青州節度使楊光遠反遣兵士取淄州刺史翟進宗入青州是冬大飢河南諸州餓死者二萬六千餘口開運元年春正月甲戌朔是夕陣雲掩北斗之魁星乙亥滄恆貝鄴馳告契丹前鋒趙延壽趙延昭引五萬騎入寇將及甘陵青州楊光遠召之也已卯契丹陷貝州知州吳繼死之庚辰以宋州節度使高行周爲北面行

營都部署以河陽節度使符彥卿爲馬軍左廂排陣使以右神武統軍皇甫遇爲馬軍右廂排陣使以陝州節度使王周爲步軍左廂排陣使以右羽林統軍潘環爲步軍右廂排陣使太原奏契丹入鴈門圍忻代二州恒滄邢三州上言契丹大至是歲天下餓死者數十萬人詔逐處長吏瘞之壬午詔取此月十三日車駕北征以前邠州節度使李周爲權東京留守乙酉車駕發東京丁亥敵騎至黎陽以侍衛馬軍都指揮使李守貞爲前軍都虞候河北危促諸州求救者人使相望戊子車駕至澶州以貝州節度使王令溫爲鄧州節度使時令溫

弟令崇自契丹至訴以舉族陷于甘陵故有是命辛卯
鄴都留守張從恩遣人夜縋城間行奏契丹主以鐵騎
三四萬建牙帳于元城以趙延壽爲魏博節度使改封
魏王延壽日率騎軍摩壘而退

案遼史太宗紀正月己丑次元城授延壽魏博

等州節度使封魏王率所部屯南樂蓋遼人甲午以北

封延壽自在己丑晉人至辛卯始得奏聞也

京留守劉知遠爲幽州道行營招討使以恆州節度使
杜威副之定州節度使馬全節爲都虞候其職員將校
委招討使便宜署置乙未大霧中有白虹相偶占者曰
斯爲海淫其下必將有戰詔率天下公私之馬以資騎
軍丙申契丹攻黎陽遣右武衛上將軍張彥澤等率勁

騎三千以禦之己亥遣譯語官孟守忠致書於契丹主
求修舊好守忠自敵帳廻契丹主復書曰己成之勢不
可改也

案遼史云辛丑晉遣使來修舊好詔割河北辛
諸州及遣桑維翰景延廣來議與薛史微異

丑太原奏與契丹戰于秀容斬首三千級生擒五百人
獲敵將一十七人賊軍散入鴟鳴谷己進軍追襲二月
甲辰朔遣石贇守麻家口何建守楊劉鎮白再榮守馬
家渡安彥威守河陽鄆州奏博州刺史周儒以城降契
丹又與楊光遠潛約光遠引契丹于馬家渡濟河時郭
謹在汶陽遣左武衛將軍蔡行遇率數百騎赴之遇伏
兵于葭葦中突然而出轉鬪數合部下皆遁行遇爲賊

所執鋒鏑重傷不能乘馬坐畚中昇至幕帳遣李守貞等水陸進兵而下以救汶陽丙午先鋒指揮使石公霸與契丹遇於戚城之北爲契丹所圍高行周符彥卿方息於林下聞賊至駭愕督軍而進契丹眾甚盛被圍數重遣人馳告景延廣請益師延廣遲留候帝進止行周等大譟瞋目奮擊賊眾傷死者甚多帝自御親兵救之

方解

宋史符彥卿傳契丹騎兵數萬圍高行周于鐵邱諸將莫敢當其鋒彥卿獨引數百騎擊之遼人遁

去行周得免高懷德傳至戚城被圍數重援兵不至危甚懷德左右射縱橫馳突眾皆披靡挾父而出

登

戚城古臺置酒以勞三將咸咎延廣不遣兵赴難相對泣下戊申契丹築壘于馬家渡東岸以騎軍列于外以

禦王師李守貞以師搏之遂破其眾賊騎散走赴河溺
死者數千遂拔其壘初西岸敵軍數萬鼓譟揚旗以助
其勢及見東岸兵敗號哭而去獲馬八百匹生擒賊將
七十八人部眾五百人送行在悉斬之辛亥夏州節度
使李彝殷合蕃漢之兵四萬抵麟州濟河侵契丹之境
以牽脅之壬子以彝殷爲契丹西南面招討使易州刺
史安審約奏戰契丹於北平賊退保祈溝關斷其橋梁
而還癸丑博州殘兵至自賊中周儒之降也賊執其軍
士將獻于幕帳行次中途守者夜寢其中軍士一人自
解桎梏爲諸兵釋縛取賊戈矛盡殺援者二百餘人南

走而歸至河無舟浮水而過溺死之餘所存者六十七人是日日有黃白暈二白虹夾日而行己未滄州奏賊眾三千人援送所掠人口寶貨等由長蘆入蕃以輕騎邀之斬獲千餘人人口輜重悉委之而走庚申宰臣馮道等再上表請聽樂皆不允時帝自期年之後于宮中閒舉細聲女樂及親征以來日于左右召淺蕃軍校奏三絃胡琴和以羌笛擊鳴鼓更舞迭歌以爲娛樂常謂侍臣曰此非音樂也故馮道奏請舉樂詔旨未允而止壬戌楊光遠率兵圍棣州刺史李瓊以州兵擊之棄營而遁冀州奏敗賊軍于城下見昇棺者訊其降者戚城

之戰上將金頭王中流矢而死此其櫬也癸亥以前鄧

州節度使何建爲東南面馬步軍都部署率師屯汶陽

甲子蜀人寇我階州三月癸酉朔契丹主領兵十餘萬

來戰時契丹僞棄元城寨已旬日矣伏精騎于頓丘故

城以待王師

通鑑鄴都留守張從恩屢奏敵已遁去大軍欲進追之會霖雨而止

設伏累

日人馬飢頓趙延壽謀曰晉軍悉在河上畏我鋒銳不

敢前進不如徑造城下四面而進攻奪其橋梁天下定

矣契丹主然之是日前軍高行周在戚城之南賊將趙

延壽趙延昭以數萬騎出王師之西契丹主自擁精騎

出王師之東兩軍接戰交相勝負至晡時契丹主以勁

兵中央出而來帝御親軍列爲後陣東西濟河爲偃月之勢旗幟鮮盛士馬嚴整契丹主望之謂左右曰楊光遠言晉朝兵馬半已餓死今日觀之何其壯耶敵騎往來馳突王師植立不動萬弩齊發飛矢蔽空賊軍稍却會有亡者告契丹主曰南軍東面人少沿河城柵不固可以攻之契丹乃率精騎以攻東邊王師敗走敵騎追之時有夾馬軍士千餘人在堤間治水寨旗幟之末出堰埭敵望見之以爲伏兵所起追兵乃止久之復戰王師又退李守超以數百騎短兵直進擊之敵稍却戰場之地人馬死者無算斷箭殘鏃橫厚數寸遇夜賊擊鉦

抽軍而退夜行三十里而舍焉護聖指揮使協霸案協霸二

字上疑有脫文亡入賊中夷其族護聖第二軍都指揮使安重

懷指揮使烏韓七監軍何彥超等臨陣畏怯手失兵仗

悉斬之乙亥契丹主帳內小校竊其主所乘馬來奔云

契丹已傳木書收軍北去案遼史三月壬午留趙德昭守貝州徙所俘戶于內地四

月癸丑還次南京契丹國志云景延廣疑有詐閉壁不敢追遼帝北歸所過焚掠民物殆盡齊州奏

青州賊軍寇明水鎮壬午禮部尙書盧詹卒贈太子少

保甲申契丹軍帳已過貝州以趙延昭守貝州遼史三月壬午

留趙延昭守貝州徙所俘戶于內地辛卯定州馬全節攻泰州拔之俘其

兵士二千人襍畜戎仗稱是己亥北京留守兼中書令

劉知遠封太原王餘如故是日詔天下抽點鄉兵凡七戶出一士六戶資之仍自具兵仗以武定爲號太常丞王緒棄市緒家于青州常致書于楊光遠緒有妾之兄嫌緒不爲賙給遂告與光遠連謀密書述朝廷機事遂收捕斬之夏四月車駕在澶州滄州奏契丹陷德州刺史尹居璠爲敵所執甲辰鄴都留守張從恩來朝丁未加從恩平章事還鄴己酉詔取今月八日車駕還京令高行周王周留鎮澶淵近地兵馬委便宜制置甲寅至自澶州曲赦京城大辟以下罪人丁巳升冀州爲防禦使額同華奏人民相食己未以右武衛上將軍張彥澤爲

右神武統軍辛酉以鄆州節度使侍衛親軍都指揮使
景延廣爲西京留守以宋州節度使高行周爲侍衛親
軍都指揮使以侍衛親軍都虞候義成軍節度使李守
貞爲兗州節度使典軍如故是日分命文武臣僚三十
六人往諸道州府括率錢帛以資軍用癸亥以西京留
守安彥威爲晉昌軍節度使以晉昌軍節度使趙瑩爲
華州節度使以左龍武統軍皇甫遇爲滑州節度使是
日置酒宮中召景延廣謂之曰卿有佐命之功保釐伊
洛非酬勳之地也因解御衣寶帶以賜之丙寅隴州奏
餓死者五萬六千口五月壬申朔太原劉知遠奏邊境

未寧軍用甚廣所封王爵乞未行冊命戊寅遣侍衛親

軍都虞候李守貞率步騎二萬討楊光遠于青州丁亥

以鄴都留守張從恩爲貝州行營都部署

通鑑張從恩上言趙延昭

雖據貝州麾下將士久客思歸宜速進軍攻詔以從恩爲貝州行營都部署

以滑州節度使

皇甫遇爲行營都虞候以左神武統軍潘瓌掌騎兵右

神武統軍張彥澤掌步兵辛卯張從恩奏貝州賊將趙

延昭縱火大掠棄城而遁

通鑑延昭屯于瀛莫阻水自固

以李守貞爲

青州行營都部署以河陽節度使符彥卿副之戊戌以

鄧州節度使何建爲貝州永清軍節度使是月澤潞上

言餓死者凡五千餘人六月辛丑朔王師拔淄州斬楊

光遠僞署刺史劉翰辛卯以太尉兼侍中馮道爲檢校
太師兼侍中充同州節度使丙午詔復置樞密院丁未
以侍中桑維翰爲中書令充樞密使權開封府尹李周
卒輟朝贈太師辛亥以邢州節度使安叔千爲晉州節
度使加同平章事以晉州節度使宋彥筠爲陝州節度
使以吏部郎中李穀充樞密直學士丙辰滑州河決漂
注曹單濮鄆等州之境環梁山河于汶濟宋史楊昭儉傳河決數郡
大發丁夫以本部帥董其役旣而塞之晉少主喜詔立
碑紀其事昭儉表諫曰陛下刻石紀功不若降哀痛之
詔摘翰頌美不若頒罪己之文言甚切至少主嗟賞之卒罷其事戊午升府州爲團練

使額庚申襄州獻白鵲甲子復置翰林學士乙丑宰臣

等三上表請聽樂詔允之戊辰以門下侍郎王松爲左
丞以右丞王易簡爲吏部侍郎以右散騎常侍蕭愿爲
秘書監以右諫議大夫王仁裕爲給事中以給事中李
式爲左散騎常侍以金部郎中知制誥徐台符爲翰林
學士以禮部郎中李瀚本官知制誥充翰林學士以刑
部郎中劉溫叟改都官郎中充翰林學士以主客員外
郎范質充翰林學士御史張宜改倉部員外郎知制誥
庚午以前晉州節度使周密爲左龍武統軍以同州節
度使李懷忠爲左羽林統軍

永樂大典卷一萬
五千六百四十九

舊五代史卷八十二終

舊五代史卷八十二攷證

晉少帝紀二以青州節度使楊光遠謀叛故也 案楊

光遠反五代春秋作十一月與是書作十二月異歐陽史從是書

乙亥滄恆貝鄴馳告契丹前鋒趙延壽趙延昭引五萬騎入寇將及甘陵 案歐陽史作甲戌朔契丹寇滄州據遼史云甲戌朔趙延壽延昭率前鋒五萬騎次任邱與歐陽史合

太原奏契丹入雁門圍忻代二州 案通鑑契丹入雁門不書日遼史作丙子入雁門圍忻代

乙酉車駕發東京丁亥敵騎至黎陽 案歐陽史作丙

戌契丹寇黎陽

辛卯鄴都留守張從恩遣人夜縋城間行奏契丹主以
鐵騎三四萬建牙帳于元城以趙延壽爲魏博節度
使改封魏王 案遼史己丑次元城授延壽魏博節
度使封魏王率所部屯南樂蓋遼人屯于元城自在
己丑晉人至辛卯始得奏聞也歐陽史作辛卯契丹
屯于元城趙延壽寇南樂殊誤

己亥遣譯語官孟守忠致書于契丹主求修舊好 案
遼史云辛丑晉遣使來修舊好詔割河北諸州及遣

桑維翰景延廣來議與是書微異

鄆州奏博州刺史周儒以城降契丹 案博州刺史周

儒降于契丹歐陽史通鑑契丹國志俱作正月是書
及遼史作二月

舊五代史卷八十二攷證

舊五代史卷八十三

宋司空同中書門下平章事薛居正等撰

少帝紀第三

晉書九

開運元年秋七月辛未朔帝御崇元殿大赦天下改天福九年爲開運元年河北諸州曾經契丹蹂踐處與免今年秋稅諸軍將士等第各賜優給諸州率借錢帛赦書到日晝時罷征出一千貫以上者與免科徭一萬貫已上者與授本州上佐云是日宣赦未畢會大雷雨勿遽而罷時都下震死者數百人明德門內震落石龍之首識者以爲石乃國姓蓋不祥之甚也癸酉以定州節

度使馬全節爲鄴都留守加兼侍中以昭義節度使安
審暉爲邢州節度使加檢校太師乙亥前陝州節度使
王周加檢校太尉改定州節度使鄴都留守張從恩改
鄆州節度使禮官奏天子三年喪畢祫享于太廟高祖
聖文章武明德孝皇帝今年八月喪終畢合以十月行
大祫之禮冬季祠祭改薦爲祫從之丁丑虞部員外郎
知制誥陶穀改倉部郎中知制誥大理卿吳德謙改祕
書監致仕辛巳以左龍武統軍李從敏爲潞州節度使
天策府都護軍桂州節度使知朗州軍事馬希杲加檢
校太師壬午降金州爲防禦州降萊州爲刺史州戶部

侍郎田敏改兵部侍郎刑部侍郎李祥改尙書左丞以
潁州團練使馮玉爲戶部侍郎充端明殿學士中書舍
人趙上交改刑部侍郎己丑以樞密使中書令桑維翰
充弘文館大學士太子太傅譙國公劉昫爲守司空兼
門下侍郎平章事監修國史判三司宰臣李崧和凝進
封爵邑庚寅宣徽北院使劉繼勳改宣徽南院使三司
使董遇改宣徽北院使辛卯以前陝州節度使石贊爲
鄧州節度使同州節度使李承福卒贈太傅八月辛丑
命十五將以禦契丹東都事略范質傳契丹入寇晉出
帝命十五將出征是夕質宿直出
城已閉慮泄機事遂獨爲之北京留守劉知遠充北面

行營都統鎮州節度使杜威充北面行營都招討使鄆
州節度使張從恩充馬步軍都監西京留守景延廣充馬
步軍都排陣使徐州節度使趙在禮充馬步軍都虞候
晉州節度使安叔千充馬步軍左廂排陣使前兗州節
度使安審信充馬步軍右廂排陣使河中節度使安審
琦充馬步軍都指揮使河陽節度使符彥卿充馬軍左
廂都指揮使滑州節度使皇甫遇充馬步軍左廂都指揮
使右神武統軍張彥澤充馬軍排陣使滄州節度使王
廷胤充步軍左廂都指揮使陝州節度使宋彥筠充馬
軍右廂都指揮使前金州節度使田武充步軍左廂排

陣使左神武統軍潘瑒充步軍右廂排陣使壬寅閩王
王延義爲其下連重遇朱文進所害眾推文進知留後
事稱天福年號間道以聞甲辰太子少傅盧文紀改太
子太傅太子少保李鏐改太子太保刑部尙書李懌改
戶部尙書給事中司徒誦改右散騎常侍以府州刺史
折從阮爲安北都護充振武節度使是夜熒惑入南斗
乙巳詔復置明經童子二科己酉以鄧州節度使王令
溫爲延州節度使癸丑以威武軍兵馬留後權知閩國
事朱文進爲檢校太傅福州威武軍節度使知閩國事
癸亥升澶州爲節鎮以鎮寧爲軍額割濮州爲屬郡甲

子以延州節度使史威爲澶州節度使九月庚午朔日
有蝕之乙酉戶部侍郎韋勳爲太子賓客以前棣州刺
史段希堯爲戶部侍郎以光祿卿張仁愿爲大理卿己
丑禮部侍郎符蒙卒壬辰太原奏代州刺史白文珂破
契丹于七里烽斬首千餘級生擒將校七十餘人癸巳
以前隴州防禦使翟光鄴爲宣徽北院使己亥以滄州
節度使王廷胤卒輟朝贈中書令冬十月壬寅兩浙節
度使吳越國王錢弘佐加守太尉庚戌以徐州節度使
北面行營馬步都虞候趙在禮爲北面行營副都統鄴
都留守馬全節爲北面行營副招討使甲寅以起居郎

知制誥賈緯爲戶部郎中知制誥戊午詔曰朕虔承顧
命獲嗣丕基常懼顛危不克負荷宵分日昃罔敢怠寧
夕惕晨興每懷祇畏但以恩信未至德教未孚理道不
明徵咎斯至向者頻年災沴稼穡不登萬姓饑荒道殣
相望上天垂譴涼德所招仍屬干戈尙興邊陲多事倉
廩不足則輟人之饑食帑藏不足則率人之資財兵士
不足則取人之丁中戰騎不足則假人之乘馬雖事不
獲已而理將若何訪聞差去使臣殊乖體認不能敦于
勉諭而乃臨以威刑自有所聞益深愧悼旋屬守臣叛
命敵騎入邊致使甲兵不暇休息軍旅有征戰之苦人

民有飛輓之勞疲瘵未蘇科徭尙急言念于茲寢食何
安得不省過興懷側身罪已載深減損思召和平所宜
去無用之資罷不急之務棄華取實惜費省功一則符
先帝慈儉之規慕前王朴素之德向者造作軍器破用
稍多但取堅剛不須華楚今後作坊製器械不得更用
金銀裝飾比于遊畋素非所好凡諸服御尤欲去奢應
天下府州不得以珍寶玩好及鷹犬爲貢在昔聖帝明
君無非惡衣菲食況于薄德所合恭行今後大官尙膳
減去多品衣服帷帳務去華飾在禦寒溫而已峻宇雕
牆昔人所誡玉杯象箸前代攸非今後凡有營繕之處

丹堊雕鏤不得過度宮闈之內有非理費用一切禁止
於戲繼聖承祧握樞臨極昧于至道若履春冰屬以天
災流行國步多梗因時致懼引咎推誠期于將來庶幾
有補更賴王公將相貴戚豪宗各啟乃心率由茲道共
臻富庶以致康寧凡百臣僚宜體朕意十一月壬申詔
曰蕃寇未平邊陲多事卽日雖無侵軼亦須廣設堤防
朕將親率虎貔躬擐甲冑候聞南牧卽便北征不須先
定日辰別行告諭所有供億宜令三司預行計度合隨
從諸司職員並宜常備行計云己卯以陳州刺史梁漢
璋充侍衛馬軍都指揮使壬午以貝州節度使何建爲

澶州節度使兼北面行營馬軍右廂排陣使以澶州節度使史威爲貝州節度使丙戌以前金州節度使田武爲滄州節度使兼北面行營步軍右廂都指揮使以前相州節度使郭謹爲鄆州節度使十二月己亥朔幸臯門射中白兔癸丑福州節度使朱文進加同平章事封閩國王丁巳青州楊光遠降光遠子承勳等斬觀察判官邱濤牙將白延祚楊瞻杜延壽等首級送于招討使李守貞乃縱火大譟劫其父處于私第以城納款遣卽墨縣令王德柔貢表待罪楊光遠亦遣節度判官楊麟奉表請死詔釋之閏月庚午以楊承信爲右羽林將軍

承祚爲右驍騎衛將軍皆光遠之子先詣闕請罪故特授是官癸酉李守貞奏楊光遠卒初光遠旣上表送降帝以光遠頃歲太原歸命欲曲全之議者曰豈有反狀滔天而赦之也乃命守貞便宜處置守貞遣人拉殺之以病卒聞乙酉前登州刺史張萬迪削奪官爵處斬青州節度判官楊麟配流威州掌書記任邈配流原州支使徐晏配流武州縱逢恩赦不在放還之限並以楊光遠叛故也工部尙書權知貢舉竇貞固奏試進士諸科舉人入策舊例夜試以三條燭盡爲限天成二年改令晝試今欲依舊夜試從之曲赦青州管內罪人立功將

士各賜優給青州吏民爲楊光遠註誤者一切不問青州行營招討使兗州節度使兼侍衛都虞候李守貞加同平章事副招討使河陽節度使符彥卿改許州節度使丙戌降青州爲防禦使額以萊州刺史楊承勳爲汝州防禦使己丑以工部尙書竇貞固爲禮部尙書太常卿王延爲工部尙書左丞王松爲太常卿以前尙書右丞龍敏爲尙書左丞癸巳以前安州防禦使李建業爲河陽兵馬留後以宣徽使崔光鄴爲青州防禦使以內客省使李彥韜爲宣徽北院使甲午以給事中邊光範爲左散騎常侍以樞密直學士吏部郎中李穀爲給事

中依前充職是月契丹耶律德光與趙延壽領全軍入

寇圍恆州分兵陷鼓城藁城元氏高邑昭慶寧晉蒲澤

欒城柏鄉等縣

案遼史已卯圍恆州下其九縣歐陽史繫于乙酉之後疑誤

前鋒至

邢州河北諸州告急詔張從恩馬全節安審琦率師屯邢州趙在禮屯鄴都

開運二年春正月戊戌朔帝不受朝賀不豫故也已亥張從恩部領兵士自邢州退至相州人情震恐趙在禮遣屯澶州馬全節歸鄴都遣右神武統軍張彥澤屯黎陽詔西京留守景延廣將兵守胡梁渡契丹寇邢州侍衛馬軍都指揮使梁漢璋改鄭州防禦使典軍如故以

齊州防禦使劉在明爲相州留後癸卯以客省使孟承誨爲內客省使滑州奏今月二日至四日相州路烽火不至甲辰以前汝州防禦使宋光鄴爲左驍衛大將軍詔青州行營將校自副兵馬使以上各賜功臣名號乙巳帝復常膳以左威衛上將軍袁蟻爲客省使上將軍如故詔滑州節度使皇甫遇率兵赴邢州馬全節赴相州契丹寇洛磁犯鄴都西北界所在告急壬子王師與契丹相拒于相州北安陽河上皇甫遇慕容彥超率前鋒與敵騎戰于榆林店遇馬中流矢僅而獲免

案遼史云皇甫

遇與濮州刺史慕容彥超將兵千騎來覘遼軍至鄴都遇遼軍數萬且戰且却至榆林店遼軍繼至遇與彥超

力戰百餘合遇馬斃步戰安審琦引騎兵踰
水以救遼軍乃還與薛史所載互有詳略
是夜張從

恩引兵退保黎陽唯留五百人守安陽河橋既而知州
符彥倫與軍校謀曰此夜紛紜人無固志五百疲兵安
能守橋卽抽入相州嬰城爲備至曙賊軍萬餘騎已陣
于安陽河北彥倫令城上揚旗鼓譟賊不之測至辰時
渡河而南悉陳甲騎于城下如攻城之狀彥倫曰此敵
將走矣乃出甲士五百于城北張弓弩以待之契丹果
引去當皇甫遇榆林戰時至晚敵眾自相驚曰晉軍悉
至矣戎王在邯鄲聞之卽時北遁官軍亦南保黎陽甲
寅以河陽留後李建崇爲邢州留後以鳳州防禦使

案原

本下有
缺文

爲河陽留後詔李守貞領兵屯滑州以宣徽北

院使李彥韜權侍衛馬步都虞候改諸道武定軍爲天
威軍已未以前許州節度使李從溫爲北面行營都招
撫使以鄆州節度使張從恩權東京留守辛酉相州奏
契丹抽退其鄉村避寇百姓已發遣各歸本家營種初
帝以不豫初平未任親御軍旅旣而張從恩馬全節相
次奏賊軍充斥恆州杜威告事勢危急帝曰北賊未平
固難安寢當悉眾一戰以救朔方生靈若晏安遲疑則
大河以北淪爲寇壤矣卽日命諸將點閱以定行計辛
酉下詔親征誅楊光遠部下指揮使張廻等五人以戎

事方興慮其扇搖故也癸亥以樞密直學士李穀爲三司副使判留司三司公事乙丑車駕發離京師是月京城北濠春冰之上有文若大樹花葉凡數十株宛若圖畫觀者如堵二月戊辰朔車駕次滑州己巳渡浮橋幸黎陽勞軍至晚還滑州以滄州節度使田武充東北面行營都部署甲戌幸澶州以景延廣爲隨駕馬步軍都鈐轄丙子大閱諸軍于戚城帝親臨之戊寅北面行營副招討使馬全節行營都監李守貞右神武統軍張彥澤等以前軍先發己卯以許州節度使符彥卿爲北面行營馬軍都指揮使以左神武統軍潘環爲北面行營

步軍都指揮使辛巳幸楊村故壘符彥卿皇甫遇李殷
率諸軍進發以左散騎常侍邊光範爲樞密直學士詔
河北諸州應蕃寇經由之地吏民遭殺害者委所在收
瘞量事祭奠詔恆州杜威與馬全節等會合進軍丙戌
幸鐵丘閱馬因幸趙在禮李從溫軍是日大雪戊子安
審琦梁漢璋領兵北征府州防禦使折從阮奏部領兵
士攻圍契丹勝州降之見進兵趨朔州甲午以河中節
度使安審琦爲北面行營馬步軍都虞候許州節度使
符彥卿充馬步軍左廂都指揮使滑州節度使皇甫遇
充馬步軍左右廂都指揮使侍衛步軍都指揮使梁漢

璋充馬步軍左右廂都指揮使侍衛步軍都指揮使李
殷充步軍左右廂都指揮使左神武統軍張彥澤充馬
軍左右廂都排陣使右神武統軍潘瓌充步軍左右廂
排陣使丙申以端明殿學士尙書戶部侍郎馮玉爲戶
部尙書充樞密使三月戊戌契丹陷祁州刺史沈斌死
之乙巳左補闕袁範先陷契丹自賊中逃歸杜威奏與
李守貞馬全節安審琦皇甫遇部領大軍赴定州易州
刺史安審約奏二月三夜差肚丁斫敵營殺賊千餘人
是日以符彥卿爲北面行營馬步軍左右廂都排陣使
以皇甫遇爲北面行營馬步軍左廂排陣使以王周爲

馬步軍右廂排陣使丁未敗于戚城還幸景延廣安審
信軍庚戌王師攻泰州刺史晉庭謙以城降易州奏狼
山寨將孫方簡破契丹千餘人斬蕃將轄里

舊作諸里
今改正

相公擄其妻以獻甲寅杜威奏收復滿城獲首領默埒
舊作沒刺
今改正相公並蕃漢兵士二千人以前戶部尙書李

懌爲兵部尙書乙卯杜威奏收復遂城丙辰奏大軍自
遂城却退至滿城時賊將趙延壽部曲來降言契丹主
昨日古北口幽州走報漢軍大下收却泰州尋下令諸
部令輜重入寨輕騎却廻戎王率五萬餘騎來勢極盛
明日前鋒必至請爲之備杜威李守貞謀曰我師糧運

不繼深入賊疆而逢大敵亡之道也不如退還泰州觀其兵勢強弱而禦之軍士皆以爲然是日還滿城丁巳至泰州戊午契丹前鋒已至己未大軍發泰州而南契丹踵其後是日次陽城庚申賊騎如牆而來我步軍爲方陣以禦之選勁騎擊賊鬪二十餘合南行十餘里賊勢稍却渡白溝而去辛酉杜威召諸將議曰戎首自來實爲勍敵若不血戰吾輩何以求免諸將然之是日敵騎還遼官軍相去數里明日我軍成列而行蕃漢轉鬪殺聲震地纔行十餘里軍中人馬飢乏癸亥大軍至白團衛村下營人馬俱渴營中掘井汲水輒壞兵士取其

泥絞汁而飲敵眾圍繞漸束其營

宋史藥元福傳晉師列方陣設拒馬爲行

砮契丹以奇兵出陣後斷糧道

是日東北風猛揚塵折樹契丹主坐車

中謂眾曰漢軍盡來祇有此耳今日竝可生擒然後平

定天下令下馬拔鹿角飛矢雨集軍士大呼曰招討使

何不用軍而令軍士虛死諸將咸請擊之杜威曰俟風

勢稍慢觀其進退守貞曰此風助我也彼眾我寡黑風

之內莫測多少若俟風止我輩無噍類矣卽呼諸將齊

力擊賊張彥澤符彥卿皇甫遇等率騎奮擊風勢尤猛

沙塵如夜敵遂大敗

宋史符彥卿傳時晉師居下風將戰弓弩莫施彥卿謂張彥澤皇甫

遇曰與其束手就擒曷若死戰然未必死彥澤然之遂潛兵尾其後順風擊之契丹大敗又藥元福傳守貞與

元福謀曰軍中飢渴已甚若候風反出戰吾屬爲擄矣
彼謂我不能逆風以戰宜出其不意以擊之此兵家之
奇也元福乃率麾下開拒馬時步騎齊進追襲二十餘
出戰諸將繼至契丹大敗

里至陽城東賊軍稍稍成列我騎復擊之乃渡河而去

案晉師敗契丹于陽城在三月癸亥守貞曰今日危急
遼史與薛史同歐陽史作庚申誤

極矣幸諸君奮命吾事獲濟兩日以來人馬渴乏今喫
水之後脚重難行速宜收軍定州保全而還上策也由
是諸將整眾而還是時契丹主坐車中及敗走車行十
餘里追兵旣急獲一橐駝乘之而走乙丑杜威等大軍
自定州班師入恆州夏四月丙子以車駕將還京差官
往西京告天地宗廟社稷辛巳駕發澶州甲申至京師

曲赦在京禁囚丁亥詔鄴都依舊爲天雄軍庚寅河東
節度使劉知遠封北平王恆州節度使杜威加守太傅
徐州趙在禮移鎮兗州宋州節度使兼侍衛親軍馬步
都指揮使高行周移鎮鄆州侍衛如故鄴都留守馬全
節改天雄軍節度使兗州節度使兼侍御衛都虞候李
守貞移鎮宋州加檢校太師兼侍衛親軍副指揮使河
中節度使安審琦加兼侍中移鎮許州許州節度使符
彥卿加同平章事移鎮徐州滑州節度使皇甫遇加同
平章事壬辰西京留守景延廣加邑封改功臣秦州節
度使侯益移鎮河中定州節度使王周加檢校太師

永樂

大典卷一萬五
千六百四十九

舊五代史卷八十三終

舊五代史卷八十三攷證

晉少帝紀三八月辛丑命十五將以禦契丹 案東都
事略亦載出帝命十五將出征事歐陽史云劉知遠
爲北面行營都統杜威爲都招討使蓋略之也
壬辰太原奏代州刺史白文珂破契丹于七里烽 案
通鑑作丙子契丹寇遂城樂壽深州刺史康彥進擊
却之與是書異歐陽史契丹國志竝與是書同
圍恆州分兵陷鼓城橐城元氏高邑昭慶寧晉蒲澤樂
城柏鄉等縣 案遼史已卯圍恆州下其九縣歐陽
史繫于乙酉之後疑誤

易州奏郎山寨將孫方簡破契丹千餘人 案孫方簡

歐陽史作孫方諫

賊勢稍却渡白溝而去 案通鑑庚申契丹大至晉軍
與戰逐北十餘里契丹踰白溝而去歐陽史庚申杜
威及契丹戰于陽城敗之俱與是書同惟遼史云已
未重威守貞引兵南遁追至陽城大敗之復以步卒
爲方陣來拒與戰二十餘合是遼師未嘗言敗也蓋
當時南北軍俱有掩節故紀載不同如此

大軍至白團衛村下營 案歐陽史作衛村通鑑攷異
引漢高祖實錄作白檀遼史從是書作白團衛村

嘉哩舊作諧里今改

舊五代史卷八十三攷證

舊五代史卷八十四

宋司空同中書門下平章事薛居正等撰

少帝紀第四

開運二年夏五月丙申朔帝御崇元殿受朝大赦天下

曆書

丁酉以右衛上將軍馬萬爲左金吾上將軍致仕戊戌
陝州節度使宋彥筠移鎮鄭州澶州節度使何建移鎮
河陽以左神武統軍潘瓌爲澶州節度使以宣徽北院
使李彥韜遙領壽州節度使兼侍衛馬軍都指揮使以
滄州節度使田武遙領夔州節度使兼侍衛步軍都指
揮使辛亥白虹貫日壬子宰臣桑維翰劉昫李崧和凝

並加階爵禮部尙書竇貞固改刑部尙書太常寺卿王松改工部尙書以尙書左丞龍敏爲太常卿以翰林學士承旨兵部侍郎李愼儀爲尙書左丞以御史中丞張允爲兵部侍郎知制誥充翰林學士承旨以左諫議大夫顏衎爲御史中丞

宋史顏衎傳喪亂之後朝綱不振衎執憲頗有風采嘗上言纔除御史

史者旋授外藩賓佐復有以私故細事求假外拜州郡無參謁之儀出入失風憲之體漸恐四方得以輕易百辟無所準繩請自今藩鎮幕僚勿得任臺官雖親王宰相出鎮亦不得奏充賓佐非奉制勘事勿得出京自餘不令釐雜務詔惟辟召入幕餘從其請

以兵部侍郎弘文館學士判館事

田敏爲國子祭酒以戶部侍郎段希堯爲兵部侍郎以工部侍郎邊蔚爲戶部侍郎依前權知開封府事以左

散騎常侍李式爲工部侍郎以給事中王仁裕爲左散騎常侍甲寅以華州節度使趙瑩爲開封尹以皇弟開封尹重睿爲秦州節度使以宣徽南院使劉繼勳爲華州節度使以前鄆州節度使張從恩爲晉州節度使丙辰杜威來朝定州奏大風雹北嶽廟殿宇樹木悉摧拔之六月乙丑朔帝御崇元殿百官入閣監修國史劉昫史官張昭遠等以新修唐書紀志列傳并目錄凡二百三卷上之賜器帛有差癸酉以恆州節度使杜威爲天雄軍節度使充鄴都留守以鄴都留守馬全節爲恆州節度使以翰林學士金部郎中知制誥徐台符爲中書

舊唐書卷一百四十五 志一百四十五

舍人以翰林學士禮部郎中知制誥李瀚爲中書舍人
翰林學士都官郎中劉溫叟加知制誥翰林學士主客
員外郎范質改比部郎中知制誥並依舊充職祠部員
外郎知制誥張沆本官充學士以太常少卿陶穀爲中

書舍人

宋史陶穀傳穀性急率嘗與充帥安審信集會杯酒相失爲審信所奏時方姑息武臣穀坐責

授太常少卿嘗上言頃聞夫婦小有爭訟淹滯卽時坊市有卽時決者至于閭閻奴婢病亡亦須檢驗吏因緣死亡喪葬必候臺司判狀奴婢病亡亦須檢驗吏因緣爲姦而邀求不己經旬不獲埋瘞望申條約以革其弊從之俄拜己亥以邠州節度使劉景巖爲陝州節度使中書舍人

己卯新授恆州節度使馬全節卒輟朝贈中書令壬午
大理卿張仁愿卒贈秘書監遣刑部尙書竇貞固等分

詣寺觀禱雨己丑以定州節度使王周爲恆州節度使
以前易州刺史安審約爲定州留後是月兩京及州郡
十五並奏旱秋七月乙未朔以待衛步軍都指揮使領
夔州節度使田武爲昭義軍節度使甲寅左諫議大夫
李元龜奏請禁止天下僧尼典買院舍從之丙辰前少
府監李鍇貶坊州司戶坐冒請逃死吏人衣糧入已故
也庚申以前齊州防禦使薛可言爲延州兵馬留後八
月甲子朔日有食之中書舍人陶穀奏請權廢太常寺
二舞郎從之丙寅宰臣和凝罷相守右僕射以樞密使
馮玉爲中書侍郎平章事使如故乙亥詔諸御史今後

除準式請假外不得以細故小事請假離京除奏制命
差推事及按察外不得以諸雜細務差出丙子以靈州
節度使馮暉爲邠州節度使加檢校太尉以前鄜州節
度使丁審琪爲左羽林統軍以前鄜州節度使郭謹爲
左神武統軍西京留司御史臺奏新授鄧州節度使宋
彥筠于銀沙灘斬廳頭鄭溫詔鞠之款云彥筠出身軍
旅不知事體不合專擅行法詔釋其罪以工部尙書王
松權知貢舉丁丑以前晉州節度使安叔千爲右金吾
上將軍以三司副使給事中李穀爲磁州刺史充北面
水陸轉運使分遣使臣於諸道率馬戍寅以左金吾上

將軍皇甫立爲左衛上將軍以右羽林統軍李懷忠爲左武衛上將軍庚辰新授潞州節度使田武卒輟朝贈太尉戊子朔湖南奏靜江軍節度使馬希杲卒九月丙申以西京留守北面馬步軍都排陣使景延廣爲北面行營副招討使丁酉以刑部侍郎趙遠爲戶部侍郎以工部侍郎李式爲刑部侍郎以中書舍人盧價爲工部侍郎價久次綸聞舊例合轉禮部侍郎或御史中丞宰臣馮玉擬此官桑維翰以爲資望淺不署狀無何維翰休沐數日玉獨奏行之維翰由是不樂與玉有間矣己亥幸繁臺觀馬遂幸李守貞第庚子以晉州節度使張

從恩爲潞州節度使吏部侍郎張昭遠加階爵酬修唐

史之勞也

宋史張昭遠傳加金紫階進爵邑

戊申升曹州爲節鎮以威

信軍爲軍額詔李守貞率兵屯澶州己酉月掩昴宿以宣徽北院使焦繼勳爲宣徽南院使以內客省使孟承誨爲宣徽北院使壬子以前太子詹事王居敏爲鴻臚卿李專美爲大理卿以太子賓客致仕馬裔孫爲太子詹事甲寅移泰州理所于滿城縣乙卯詔相州節度使張彥澤率兵屯恆州冬十月戊寅以河陽節度使何建爲涇州節度使以許州節度使李從溫爲河陽節度使以前鄭州節度使石贇爲曹州節度使庚午遣使太子

賓客羅周岳使副太子右庶子王延濟冊兩浙節度使
錢弘佐爲守太尉辛未右金吾衛上將軍楊彥詢卒贈
太子太師丁丑高麗遣使貢方物庚辰以前延州節度
使王令溫爲靈州節度使庚寅以邢州兵馬留後劉在
明爲晉州兵馬留後以前河陽留後方太爲邢州留後
癸巳升陳州爲節鎮以鎮安軍爲軍額十一月戊戌以
邠州節度使馮暉兼侍衛步軍都指揮使充北面行營
先鋒馬步軍都指揮使以權知高麗國事王武爲檢校
太保使持節元菟州都督充大義軍使封高麗國王癸
卯日南至帝御崇元殿受朝賀戊申兩浙奏順化軍節

度使錢鐸卒甲寅以壽州節度使侍衛馬軍都指揮使
李彥韜爲陳州節度使典軍如故丙辰前商州刺史李
俊除名坐受財枉法也十二月乙丑以兩浙節度使吳
越國王錢弘佐兼東南面兵馬都元帥丙寅以吳越國
金馬左廂都指揮使湖州刺史胡思進遙領虔州昭信
軍節度使以吳越國金馬右廂都指揮使明州刺史闕
璠遙領宣州寧國軍節度使並典軍如故左羽林統軍
丁審琪卒贈太尉辛未以工部侍郎盧價爲禮部侍郎
以右散騎常侍集賢殿學士判院事司徒詡爲工部侍
郎依前充職以前中書舍人殷鵬爲給事中充樞密直

學士以給事中劉知新爲右散騎常侍乙亥陝府節度使劉景巘來朝丁丑狩于近郊獵也已卯光祿卿致仕陳元卒于太原庚辰命使冊高麗國王王武癸未以前兗州節度使安審信爲華州節度使丁亥以樞密使中書令桑維翰爲開封尹以司空門下侍郎平章事劉昫判三司以左僕射門下侍郎平章事李崧爲守侍中充樞密使以開封尹趙瑩爲中書令弘文館大學士以宣徽南院使焦繼勳知陝州軍州事宋史焦繼勳傳西人寇邊朝議發師致討繼勳抗疏請行拜秦州觀察使兼諸蕃水陸轉運使既至推恩信設方略招誘諸部相率奉玉帛牛酒乞盟邊境以安俄徙知陝州己丑邠州節度使馮暉準詔來朝是歲帝每

遇四方進獻器皿多以銀于外府易金而入謂左右曰

金者貴而且輕便于人力識者以爲北遷之兆也

宋史劉濤

傳少帝奢侈常以銀易金廣其器皿李崧判三司令上庫金之數及崧以原簿校之少數千鎰崧責曰帑庫通式一日不受虛數毫釐則有重典濤曰帑司常有報不盡數以備宣索崧令有司劾濤濤事迫以情告樞密使桑維翰乃止

罰一月俸

開運三年春正月癸巳朔帝御崇元殿受朝賀仗衛如式詔改鑄天下合同印書詔印御前並以黃金爲之己亥貝州梁漢璋奏蕃寇屯聚將謀入寇詔符彥卿屯荊州口

宋史符彥卿傳再出河朔彥卿不與易其行伍配以羸師數千戍荊州口

癸卯以前華

州節度使劉繼勳爲同州節度使以陝州節度使劉景

巖爲鄧州節度使丙午以宣徽南院使知陝州事焦繼
勳爲陝州留後丁未刑部員外王涓賜私家自盡坐私
用官錢經營求利故也右司郎中李知損貶均州司戶
員外置馳驛發遣坐前任度支判官日與解縣榷鹽使
王景遇交遊借貸故也已酉詔侍衛親軍副都指揮使
李守貞率師巡撫北邊辛亥以皇弟秦州節度使重睿
爲許州節度使以許州節度使安審琪爲兗州節度使
以兗州節度使趙在禮爲晉昌軍節度使癸丑以涇州
節度使何建爲秦州節度使以前貝州節度使史威爲
涇州節度使乙卯定州奏契丹入寇己未二王後守太

僕少卿襲鄆國公楊延壽除名配流威州終身勿齒延
壽奉命于磁州檢苗受贓二百餘匹準律當絞有司以
二王後入議故貸其死二月壬戌朔日有蝕之詔滑州
皇甫遇率兵援糧入易定等州甲子以滄州留後王景
爲本州節度使右僕射和凝逐月別給錢五萬兼糧芻
粟等優舊相也辛未魯國大長公主史氏薨輟朝三日
丙子光祿卿致仕王弘贇卒贈太常卿廼鵬遣使貢方
物升桂州全義縣爲溥州仍隸桂州其全義縣改爲德
昌縣從湖南馬希範所請也壬午以前晉昌軍節度使
安彥威充北面行營副都統以宣徽北院使兼太府卿

孟承誨爲右武衛大將軍充職是日幸南莊命臣寮泛舟飲酒因幸杜威園醉方歸內甲申河陽節度使李從溫卒輟朝贈太師三月壬辰朔以權知河西節度使張遵古爲河西留後乙未以御史中丞顏珣爲戶部侍郎以戶部侍郎趙遠爲御史中丞丙申以邠州節度使兼侍衛步軍都指揮使馮暉爲河陽節度使以前涇州節度使李德珣爲邠州節度使李守貞奏大軍至衡水己亥奏獲鄭州刺史趙思恭癸卯奏大軍廻至冀州戶部侍郎顏珣表上以母老乞解官就養從之戊申以皇子齊州防禦使延煦爲澶州節度使辛亥密州上言飢民

殍者一千五百庚申以瓜州刺史曹元忠爲沙州留後
夏四月辛酉朔李守貞自北班師到闕太原奏吐渾白
可久奔歸契丹諸侯咸有異志乙未宰臣詣寺觀禱雨
曹州奏部民相次餓死凡三千人時河南河北大飢殍
殍甚眾沂密兗鄆寇盜羣起所在屯聚剽劫縣邑吏不
能禁兗州節度使安審琦出兵捕逐爲賊所敗戊寅幸
相國寺禱雨皇子延煦與晉昌軍節度使趙在禮結婚
命宗正卿石光贊主之五月庚寅朔以兵部郎中劉皞
爲太府卿戊戌以前同州節度使馮道爲鄧州節度使
定州奏部民相次擄殺流移約五千餘戶青州奏全家

殍死者一百一十二戶沂州奏淮南遣海州刺史領兵
一千五百人應接賊頭常知及詔兗州安審琦領兵捕
逐甲子以前太子賓客韋勳爲太子賓客兗州安審琦
奏淮賊抽退賊頭常知及與其次首領武約等並乞歸
命辛未幸大年莊遊船習射帝醉甚賜羣官器帛有差
夜分方歸丙戌申以鄆州留後李殷爲定州節度使辛
亥詔皇甫遇爲北面行營都部署張彥澤爲副李殷爲
都監領兵赴易定等州尋止其行甲寅以貝州留後梁
漢璋爲貝州節度使以左神武統軍郭謹爲鄆州節度
使六月庚申朔登州奏文登縣部內有銅佛像四螯佛

像十自地踴出狼山招收指揮使孫方簡叛據梁山歸

契丹

案遼史五月庚戌晉易州戍將孫方簡請內附蓋方簡歸契丹自在五月至六月晉人始奏聞也歐

陽史從薛史作六月

乙丑詔諸道不得橫薦官僚如本處幕府有

闕卽得奏薦丙寅以前昭義軍節度使李從敏爲河陽

節度使以河陽節度使兼侍衛步軍都指揮使馮暉爲

靈州節度使壬午以鄆州節度使兼侍衛親軍都指揮

使高行周爲宋州節度使加兼中書令充北面行營副

都統以宋州節度使侍衛親軍都指揮使

案以下原本有闕文

定

州奏蕃寇壓境詔李守貞爲北面行營都部署滑州皇

甫遇爲副相州張彥澤充馬軍都指揮使定州李殷充

步軍都指揮使七月壬辰以禮部尙書王延爲刑部尙書以工部尙書王松爲禮部尙書以太常卿龍敏爲工部尙書以左丞李愼儀爲太常卿以吏部侍郎張昭遠爲左丞以右丞李詳爲吏部侍郎以前義州刺史李玘爲右丞前晉昌軍節度使安彥威卒輟朝贈太師丙申兩浙節度使吳越國王錢弘佐加守太師北京留守河東節度使北平王劉知遠加守太尉滄州奏蕃寇攻饒安縣楊劉口河決而岸水闊四十里以前鄧州節度使劉景巖爲太子太師致仕辛亥宋州穀熟縣河水雨水一概東流漂沒秋稼丁巳大理卿李專美卒戊午詔僞

清泰朝經削奪官爵朱弘昭馮贇康義誠王思同藥彥
稠等並復其官爵自夏初至是河南河北諸州郡餓死
者數萬人羣盜蜂起剽掠縣鎮霖雨不止川澤汎漲損
害秋稼八月己未朔以左諫議大夫裴羽爲給事中庚
申李守貞皇甫遇駐軍定州辛酉幸南莊召從臣宴樂
至暮還宮詔潞州運糧十三萬赴恆州癸亥以右散騎
常侍張煦爲青州刺史李守貞奏大軍至望都縣相次
至長城北遇敵千餘騎轉鬪四十里斬蕃將嘉哩舊作解里
今改相公丁卯詔班師庚午以前亳州防禦使邊蔚爲
戶部侍郎以刑部侍郎李式爲戶部侍郎充三司副使

以禮部侍郎盧價爲刑部侍郎以樞密直學士左散騎

常侍邊光範爲禮部侍郎充職

宋史邊光範傳少帝以光範藩邸舊僚待遇尤

厚因遊宴見光範位翰林學士下卽日拜尙書禮部侍郎知制誥充翰林學士仍直樞密院

辛未以

右龍武統軍周密爲延州節度使癸酉河東節度使劉

知遠奏誅吐渾大首領白承福白鐵匱赫連海龍等並

夷其族凡四百口蓋利其孳畜財寶也人皆冤之甲戌

以大理少卿劇可久爲大理卿棣州刺史慕容彥超削

奪在身官爵房州安置坐前任濮州擅出省倉麥及私

賣官麴準法處死太原節度使劉知遠上表救之故貸

其死丙戌靈州馮暉奏與威州刺史藥元福于威州土

橋西一百里遇吐蕃七千餘人大破之斬首千餘級是月秦州雨兩旬不止鄴都雨水一丈洛京鄭州貝州大水鄴都夏津臨清兩縣餓死民凡三千三百盜入臨濮費縣秋九月壬辰鄆州節度使侍衛親軍都指揮使李守貞加兼侍中滑州節度使皇甫遇進封邠國公相州節度使張彥澤加檢校太尉甲午以權知威武軍節度使李弘達爲檢校太尉同平章事充福建節度使知閩國事乙未前商州刺史李俊賜自盡坐與親妹姦及行劒斫殺女使又殺部曲孫漢榮強姦其妻準法棄市詔賜死于家己亥張彥澤奏破蕃賊于定州界斬首二千

餘級追襲百餘里生擒蕃將四人摘得金耳環二副進
呈癸卯太原奏破契丹楊武谷殺七千餘人甲辰以天
策上將軍江南諸道都統楚王馬希範兼諸道兵馬都
元帥詔開封府以霖雨不止應京城公私僦舍錢放一
月乙巳詔安審琦率兵赴鄴都皇甫遇赴相州丙午以
太子少保楊凝式爲太子少傅以刑部尙書王延爲太
子少保前潁州團練使竇貞固爲刑部尙書是月河南
河北關西諸州奏大水霖雨不止溝河泛溢水入城郭
及損害秋稼是月契丹瀛州刺史

案以下疑脫
劉延祚三字

詐爲書

與樂壽軍監王巒願以本城歸順且言城中蕃軍不滿

千人請朝廷發兵襲取之已爲內應又云今秋苦雨川澤漲溢自瓦橋以北水勢無際戎王已歸本國若聞南夏有變地遠阻水雖欲奔命無能及也又巒繼有密奏苦言瀛鄭可取之狀先是前歲中軍駕駐于河上曾遣邊將遺書于幽州趙延壽勸令歸國延壽尋有報命依違而已是歲三月復遣鄴都杜威致書于延壽且述朝旨啖以厚利仍遣沼州軍將趙行實賁書而往潛申款密行實會事延壽故遣之七月行實自燕廻得延壽書且言久陷邊庭願歸中國乞發大軍應接卽拔身南去敘致懇切詞旨綿密時朝廷欣然信之復遣趙行實計

會延壽大軍應接之所有瀛州大將遣所親賁蠟丸書
至闕下告云欲謀翻變以本城歸命未幾會彼有告變
者事不果就至是瀛州守將劉延祚受戎王之命詐輸
誠款以誘我軍國家深以爲信遂有出師之議

永樂大典卷一

萬五千六
百四十九

舊五代史卷八十四終

舊五代史卷八十四攷證

晉少帝紀四監修國史劉昫史官張昭遠等以新修唐
書紀志列傳並目錄凡二百三卷 案郡齋讀書志
直齋書錄解題並作二百卷五代會要作二百二卷
目錄一卷

己亥幸繁臺觀馬 案歐陽史作閱馬于萬龍岡
皇子延煦與晉昌軍節度趙在禮結婚 案皇子延煦
娶趙在禮女通鑑作三月庚申與是書作四月戊寅
異

己亥張彥澤奏破蕃人于定州界 案歐陽史作辛丑

張彥澤及契丹戰于新興敗之

是月契丹瀛州刺史詐爲書與樂壽將軍王鬱願以本
城歸順 案瀛州刺史下疑脫劉延祚三字通鑑攷
異云歐陽史作高半翰案陷蕃記前云延祚詐翰誠
疑後云大軍至瀛州偵知蕃將高半翰潛師而出蓋
延祚爲刺史半翰乃戍將耳

舊五代史卷八十四攷證

舊五代史卷八十五

宋司空同中書門下平章事薛居正等撰

少帝紀第五

晉書

開運三年冬十月甲子正衙命使冊皇太妃安氏乙丑
以樞密直學士禮部侍郎邊光範爲翰林學士以給事
中邊歸讜爲左散騎常侍以翰林學士祠部員外郎知
制誥張沆爲右諫議大夫辛未以鄴都留守杜威爲北
面行營都招討使以侍衛親軍都指揮使鄆州節度使
李守貞爲兵馬都監兗州安審琦爲左右廂都指揮使
徐州符彥卿爲馬軍左廂都指揮使滑州皇甫遇爲馬

軍右廂都指揮使貝州梁漢璋爲馬軍都排陣使前鄧

州案原本有闕文宋彥筠爲步軍左廂都指揮使奉國左廂都

指揮使王饒爲步軍右廂都指揮使洺州團練使薛懷

讓爲先鋒都指揮使案通鑑載當時敕勝曰先取瀛郭

征于陽城之役而驟驕也癸酉冊吳國夫人馮氏爲皇后乙亥以侍

衛馬軍都指揮使李彥韜權知侍衛司事丙戌鳳翔節

度使秦王李從曦薨輟朝贈尙書令丁亥邠州節度使

李德琬卒輟朝贈太尉十一月戊子朔以給事中盧撰

爲右散騎常侍以尙書兵部郎中兼侍御史知雜事陳

觀爲左諫議大夫觀以祖諱義乞改官尋授給事中庚

寅樞密使中書侍郎兼戶部尙書平章事馮玉加尙書
右僕射以皇子鎮寧軍節度使延煦爲陝州節度使以
陝州留後焦繼勳爲鳳翔留後以前定州留後安審琦
爲邠州留後以右僕射和凝爲左僕射甲午兩浙節度
使吳越國王錢弘佐起復舊任丁酉詔李守貞知幽州
行府事戊申日南至御崇元殿受朝賀是月北面行營
招討使杜威率諸將領大軍自鄴北征師次瀛州城下
貝州節度使梁漢璋戰死杜威等以漢璋之敗遂收軍
而退行次武強聞戎王入寇欲取直路自冀貝而南會
張彥澤領騎自鎮定至且言契丹可破之狀于是大軍

西趨鎮州十二月丁巳朔

案以下有闕文據通鑑云丁巳朔李穀自書密奏且言大

軍危急之勢請車駕幸滑州遣高行周符彥卿扈從及發兵守澶州河陽以備敵之奔衝遣軍將關勳走馬上之

己未杜威奏駐軍于中渡橋庚申以前司農卿儲延

英爲太子賓客詔徐州符彥卿屯澶州辛酉詔澤潞鄴都邢洛河陽運糧赴中渡杜威遣人口奏軍前事宜勢迫故也壬戌又遣高行周屯澶州景延廣守河陽博野縣都監張鵬入奏蕃軍事勢丙寅定州李殷奏前月二十八日夜領捉生四百人往曲陽嘉山下逢賊軍車帳殺千餘人獲馬二百匹詔宋州高行周充北面行營都部署符彥卿充副邢州方太充都虞候領後軍駐于河

上以備敵騎之奔衝也時契丹遊騎步瀋水而南至樂
城縣自是中渡寨爲蕃軍隔絕探報不通朝廷大恐故
委行周等繼領大師守扼津要且以張其勢也已巳邢
州方太奏此月六日契丹與王師戰于中渡王師不利
奉國都指揮使王清戰死庚午幸沙臺射兔王申始聞
杜威李守貞等以此月十日率諸軍降于契丹案遼史
杜重威
等降于遼在四月丙寅與薛史同歐陽史作壬戌疑誤
歐陽史作壬戌攷歐紀壬戌之日自紀淳沱戰敗而杜
威等之降上不係日觀杜重威傳明著十二月丙寅于
薛史未嘗不合也遼史以其弟承信爲平盧軍節度使
襲父爵是夜相州節度使張彥澤受契丹命率先鋒二千

人自封丘門斬關而入癸酉旦張彥澤頓兵于明德門

外京城大擾前曹州節度使石贇死帝之堂叔也時自
中渡寨隔絕之後帝與大臣端坐憂危國之衛兵悉在
北面計無所出十六日聞潯水之降是夜偵知張彥澤
已至滑州召李崧馮玉李彥韜入內計事方議詔河東
劉知遠起兵赴難至五鼓初張彥澤引蕃騎入京宮中
相次火起帝自攜劒驅擁后妃已下十數人將同赴火
爲親校薛超所持俄自寬仁門遞入契丹主興皇太后
書帝乃止旋令撲滅煙火大內都點檢康福全在寬仁
門宿衛登樓覘賊彥澤呼而下之癸酉帝奉表于戎主
曰孫臣某言今月十七日寅時相州節度使張彥澤都

監富珠哩

舊作傳住而今改正

部領大軍入京賁到翁皇帝賜太

后書示于滹沱河降下杜重威一行馬步兵士見領蕃
漢步騎來幸汴州者往者唐運告終中原失馭數窮否
極天缺地傾先人有田一成有眾一旅兵連禍結力屈
勢孤翁皇帝救患摧剛興利除害躬擐甲冑深入寇塲
犯露蒙霜度雁門之險馳風擊電行中冀之誅黃鉞一
麾天下大定勢凌宇宙義感神明功成不居遂興晉祚
則翁皇帝有大造于石氏也旋屬天降鞠凶先君卽世
臣遵承遺旨續紹前基諒陰之初荒迷失次凡有君國
重事皆委將相大臣至于擅繼宗祧旣非稟命輕發文

字輒敢抗尊自啟衅端果貽赫怒禍至神威運盡天亡
十萬師徒皆望風而束手億兆黎庶悉延頸以歸心臣
負義包羞貪生忍恥自貽顛覆上累祖宗偷度朝昏苟
存視息翁皇帝若惠顧疇昔稍霽雷霆未賜靈誅不絕
先祀則百口荷更生之德一門銜無報之恩雖所願焉
非敢望也臣與太后並妻馮氏及舉家戚屬見于郊野
面縛俟罪次所有國寶一面金印三面今遣長子陝府
節度使延煦次子曹州節度使延寶管押進納並奉表
請罪陳謝以聞甲戌張彥澤遷帝與太后及諸屬于開
封府遣控鶴指揮使李榮將兵監守是夜開封尹桑維

翰宣徽使孟承誨皆遇害帝以契丹主將至欲與太后
出迎彥澤先表之稟契丹之旨報云比欲許爾朝覲上
國臣僚奏言豈有兩個天子道路相見今賜所佩刀子
以慰爾心己卯皇子延煦延寶自帳中廻得僞詔慰撫
帝表謝之時契丹主以所送傳國寶製造非工與載籍
所述者異使人來問帝進狀曰頃以僞主王從珂于洛
京大內自焚之後其眞傳國寶不知所在必是當時焚
之先帝受命旋製此寶在位臣僚備知其事臣至今日
敢有隱藏云時移內庫至府帝使人取帛數段主者不
與謂使者曰此非我所有也又使人詣李崧求酒崧曰

臣有酒非敢愛惜慮陛下杯酌之後憂躁所作別有不測之事臣以此不敢奉進丙戌晦百官宿封禪寺明年正月朔契丹主次東京城北百官列班遙辭帝于寺詣北郊以迎契丹主帝族出封丘門肩輿至野契丹主不與之見遣泊封禪寺文武百官素服紗帽迎謁契丹主於郊次俯伏俟罪契丹主命起之親自慰撫契丹主遂入大內至昏出宮是夜宿于赤岡僞詔應晉朝臣僚一切仍舊朝廷儀制並用漢禮戊子殺鄭州防禦使楊承勳責以背父之罪令左右轢割而死

遼史以其弟承信爲平盧軍節度使

襲父爵

己丑斬張彥澤于市以其剽劫京城恣行屠害也

遼史以張彥澤擅徙重貴開封殺
桑維翰縱兵大掠不道斬于市

庚寅洛京留守景延

廣自扼吭而死辛卯契丹制降帝爲光祿大夫檢校太
尉封負義侯黃龍府安置其地在渤海國界癸巳遷帝
于封禪寺遣蕃大將崔廷勳將兵守之癸卯帝與皇太
后李氏皇太妃安氏皇后馮氏皇弟重睿皇子延煦延
寶俱北行以宮嬪五十人內官三十人東西班五十人
醫官一人控鶴官四人御厨七人茶酒三人儀鸞司三
人軍健二十人從行宰臣趙瑩樞密使馮玉侍衛馬軍
都指揮使李彥韜隨帝入蕃契丹主遣三百騎援送而
去所經州郡長吏迎奉皆爲契丹主阻絕有所供饋亦

不通

宋史李穀傳少帝蒙塵而北舊臣無敢候謁者穀獨拜迎于路君臣相對泣穀曰臣無狀負陛下因

傾囊以獻

嘗一日帝與太后不能得食乃殺畜而啖之帝過

中渡橋閱杜重威營寨之迹慨然憤歎謂左右曰我家

何負爲此賊所破天平天平于是號慟而去至幽州傾

城士庶迎看于路見帝慘沮無不嗟歎

宣政雜錄徽宗北狩經薊縣梁

魚務有還鄉橋石少帝所命名也里人至今呼之

駐留旬餘州將承契丹命犒

帝于府署趙延壽母以食饌來獻自范陽行數十程過

薊州平州至榆關沙塞之地略無供給每至宿頓無非

路次一行乏食宮女從官俱採木實野蔬以救飢弊又

行七八日至錦州契丹迫帝與妃后往拜案巴堅

舊作阿保

機今改正遺像帝不勝屈辱泣曰薛超誤我不令我死以至

今日也又行十數程渡遼水至黃龍府此卽戎王所命安置之地也六月契丹國母召帝一行往懷密州州在黃龍府西北千餘里行至遼陽皇后馮氏以帝陷蕃過受艱苦令內官潛求毒藥將自飲之並以進帝不果而止又行二百里會國母爲永康王所執永康王請帝却往遼陽城駐泊帝遣使奉表于永康且賀克捷自是帝一行稍得供給漢乾祐元年四月永康王至遼陽帝與太后並詣帳中帝御白衣紗帽永康止之以常服謁見帝伏地雨泣自陳過咎永康使左右扶帝上殿慰勞久

之因命設樂行酒從容而罷永康帳下從官及教坊內人望見故主不勝悲咽內人皆以衣帛藥餌獻遺于帝及永康發離遼陽取內官十五人東北班十五人及皇子延煦並令隨帳上涇涇卽蕃王避暑之地也有綽諾錫里

舊作禪奴舍利今改正

者卽永康之妻兒也知帝有小公主

在室詣帝求之帝辭以年幼不可又有東西班數輩善于歌唱綽諾又請之帝乃與之後數日永康王馳取帝幼女而去以賜綽諾至八月永康王下涇太后馳至霸州詣永康求于漢兒城寨側近賜養種之地永康許諾令太后于建州住泊漢乾祐二年二月帝自遼陽城發

赴建州行至中途太妃安氏得疾而薨乃焚之載其櫬
骨而行帝自遼陽行十數日過儀州霸州遂至建州節
度使趙延暉盡禮奉迎館帝于衙署中其後割寨地五
十餘頃其地至建州數十里帝乃令一行人員于寨地
內築室分耕給食于帝是歲舒嚕

舊作述律
今改正

王子遣契

丹數騎詣帝取內人趙氏聶氏疾馳而去趙聶者帝之

寵姬也及其被奪不勝悲憤漢乾祐三年八月太后薨

周顯德初有漢人自塞北而至者言帝與后及諸子俱

無恙猶在建州其隨從職官役使人輩自蕃中亡歸物

故者大半矣

永樂大典卷一萬五千六百四十九
郡齋讀書志云晉朝陷蕃記范質撰質石晉

郡

末在翰林爲出帝草降表知其事爲詳記少帝初遷于黃龍府後居于建州凡十八年而卒案契丹丙午歲入汴順數至甲子歲爲十八年實太祖乾德二年也五代史補少主之嗣位也契丹以不俟命而擅立又景延廣辱其使契丹怒舉國南侵以駙馬都尉杜重威等領駕下精兵甲禦之于中渡河橋旣而契丹之眾已深入而重威等奏報未到朝廷時桑維翰罷相爲開封府尹謂僚佐曰事急矣非大臣鉗口之時乃叩內閣求見欲請車駕親征以固將士之心而少主方在後苑調鷹至暮竟不召維翰退而歎曰國家阽危如此草澤逋客亦宜下問況大臣求見而不召耶事亦可知矣未幾杜威之徒降于契丹少主遂北遷焉

史臣曰少帝以中人之才嗣將墜之業屬上天不祐仍歲大飢尙或絕強敵之歡盟鄙輔臣之謀略奢淫自縱謂有泰山之安委託非人坐受平陽之辱族行萬里身老窮荒自古亡國之醜者無如帝之甚也千載之後其

如恥何傷哉

永樂大典卷一萬
五千六百四十九

舊五代史卷八十五終

舊五代史卷八十五攷證

晉少帝紀五己未杜威奏駐軍于中渡橋 案通鑑甲

寅威等至中渡橋十二月己未帝始聞大軍屯中渡
胡三省注云強寇深入諸軍孤危而驛報七日始達
晉之爲兵可知矣歐陽史作己未杜威軍于中渡蓋
以奏聞之日爲駐軍之日

降帝爲光祿大夫 光祿遼史避諱作崇祿

內官三十人 案遼史作內宦三人

軍健二十人 案遼史作健卒十人

舊五代史卷八十五攷證